

春秋家說

春秋家說卷三上

船山

十四

衛陽王夫之誤

襄公

晉靈之世鄭宋爭而楚因鄭以偏宋晉悼之初鄭宋爭而鄭借楚以抗晉故楚勢莫如鄭晉勢莫如宋乃宣之元年晉出微師以撓鄭而宋人偕其後遂委宋之自戰而晉無事此趙盾所以喪諸侯也襄之元年晉勤師以加鄭韓厥獨行諸侯次于郕而宋人不與楚鄭屢犯宋晉皆當之而宋人不報此韓厥所以能合天下也晉委宋于鄭則威喪于鄭恩喪于宋弱宋以自失其輔是三喪也晉專鄭于己

而置宋于無爭則鄭無深怨于宋而益畏晉宋益暇而可
以爲晉拒楚是交得也鄭畏晉之專己威不喪也鄭無深
怨于宋則有加于宋而不力宋乃暇焉則宋恩晉也宋不
爭鄭楚無讐以過求夫宋輔不失也是故韓厥之爲是謀
審乎利害之歸矣天下無非義而可以利傳曰放于義而
行以其知伯者之義矣以其身而任天下之伯利亦已擇
之害亦已赴之實亦已任之名亦已尸之害不分名不委
夫然後可以守諸侯而任天下之隨故易姤之二曰包有
魚不利賓象曰義不及賓也象言利夫子言義義在而委
之利亦委之矣故義者利之合也知義者知合而已矣

老子曰聖人不死大盜不止激夫竊禮樂者攘臂以仍成
乎大盜而已甚言之也已甚言之激于末而忘其序夫竊
者固有序竊於人者亦有序是故反之以防其失也亦有
序禮樂之竊與其見竊則皆自征伐始矣征伐末之有竊
而遽有竊禮樂者必不受竊也童子之手搏黍莫與批之
固不可得而奪矣征伐之不能竊而遽竊其禮樂必不能
竊也一夫無挾遽黃其屋而冕其首狂而已矣旦然而夕
戮矣夫知竊者之序先于征伐受竊者之序先喪其征伐
則禮樂之竊大亂之極而始防不在是也非亂之始則禮
樂雖竊不任其咎況其本不聽竊者乎又況夫禮樂之行

節征伐而制其度足以治夫征伐之竊者乎故弗獲已而
咎征伐之爲竊資猶賢于其咎禮樂也雞澤之會大夫受
盟溴梁之會大夫庚盟宋之會大夫戶盟大夫盟而齊遂
移晉遂分魯遂專是會盟之爲盜資也而非也悼公立六
年而後親將以出欒韓荀三大夫專以其兵馳驅天下控
夫齊宋魯衛暨小國之卿胥制諸侯之師以成乎下移兵
歸之民從之功歸之天下望之權歸之君且畏之以無耦
之威成尤重之望率習于相從之民上偪其主而後會盟
之竊若行所無事而用其不容已是故弗獲已咎征伐之
召竊猶之可也征伐不可弭固不可勒卽可以勿勒之道

防之也征伐勤國君倦恤之以凶危誘之以利安于是受
竊者發其篋出其器恬以授盜而不驚大禮之行雖勤不
倦大禮之制尊而光大禮之儀恭而安以審度而節兵利
器不操而固無所喪患容彼竊者而斤斤以之憂爲
善用者不用其所用善威人者不威以其所畏天下無可
頻用而威無固威久矣用頻則竭威以所必畏則徐測其
無足畏而威亦盡也楚之爲天下患自熊通始熊通之以
患天下自蔑周始蔑周而不能得志于天下楚猶有畏天
下之心而無畏于周明矣齊桓召陵之師實以天下之可
畏者制之而名以周之職貢收之楚固不欲暴其畏天下

之實無庸收之于畏周而楚服惟夫齊桓之不殫其威而
以不用者用也乃桓名用周而實未用則其用周也固未
嘗以用用之也夫名者固有時而生乎實楚無庸收之于
畏周而遂成乎畏齊故以莊王之彊自處以伯不絕于周
之侯服去熊通之自大也已遠于是乎忌周之勢成楚忌
周則是周可以畏楚而晉得以用之也乃周僅有其威而
晉之不宜頻用也亦審矣何也周之威惟以不實用而僅
有者也晉厲之伐鄭三用尹單柯陵之盟二子與欽逮乎
悼公收鄭通吳以爲雞澤之盟而單子復蒞是何用周之
亟也夫晉之不能下楚而僅爭之鄭不足于楚之勢也爭

鄭而不得鄭同盟以謀之尤不足于鄭之勢也僅得鄭而大會以收之要盟以保之自無可必保而拔吳以情之尤大不足于楚鄭之勢也有不足之勢暴于楚暴于鄭然且煌然引重于周則晉之不能得鄭而急保鄭無以抑楚而仰之吳實已暴名已無權周之威無有餘焉者矣暴周威之無餘貽楚以無畏之慰而益生其力楚力生晉力死故竭其用者竭其力也于是而齊桓之陰陽名實起無威之用以伸威于楚者其短長盡露而道爲之窮夫晉之始伯無是也戰勝楚而後爲溫之會示楚不足當周之治也靈景之世晉爲楚絀而猶無求于周故莊王之彊不自處

于伯而不得厲始用周悼踵用周而周竭周竭而晉恃以
伯者亦竭幸楚審之非熊通平旅也悼乃薄收之鄭而不
喪諸侯以厲悼之事值通旅之敵晉償而周亡久矣晉悼
之宜喪伯也三而獎大夫不與焉用周用吳無能加楚而
全力以向鄭三者皆足以亡恃無其敵焉耳春秋書悼公
之事張皇紛紜隨隨勞疲情形具于策望而知晉之且替
傳曰史外傳心之要典其此謂乎

以德建者與畜德者鄰以道建者與適道者鄰以謀建者
與善謀者鄰故書曰臣哉鄰哉鄰其所鄰而有功故易曰
出門交有功晉悼之不擇下而與猥末之陳鄭相鄰以謀

功之謂也不亦宜乎鄭之決從楚也盟諸以後十三年矣
陳之不北向也辰陵以來二十有九年矣公子申雖從
于吳嬰齊盡死夫二國者乃驚愕失措而請盟于晉時
以此謀國亡之徒也與亡之徒者鄰驚喜失據奉王臣合
天下以與之謀晉之去陳鄭也能幾哉往者晉得鄭則楚
師必及于滎鄭受盟于雞澤楚兵不加鄭者五年側戮申
殛嬰齊不保王夫貪而專國陳以之叛夫非謂楚釁之不
可乘也非謂陳鄭之來而不宜受也陳鄭偷而附于晉晉
能弗以偷受之則知二國者失據而無固志閔其弱以懼
焉重可閔而不可恃也閔而受之知不可恃徐收之而不

爲之勸晉文之于衛請盟不許不恤徧心之譏而持之益
堅此志焉耳奉王臣合天下以敷心腹腎腸于不可恃之
羸者相與爲儉以待王夫之死而後戒何戒之晚也若夫
楚之有可乘矣上不難以請王命致王臣下不難以盡合
山東之侯氏投閒而起大舉以向申息之北門亦奚求而
不得而屈一鄭君致一陳大夫卽若定天下于几席之上
沾沾然兩旬之內再勒雞狗馬之血指天畫地而謀保此
一口是陳鄭之以救亡而取亡者晉乃欲用之以伯是可
不爲之大哀邪齊桓之用江黃以成伯而卽以毀伯固不
如晉文之獨用齊秦也江黃無恃力而陳鄭抑無恃心亡

之徒者恃我以爲心未聞我之以彼爲心也晉厲公再振之業衰于悼喪于平絕于昭無他不擇而已矣己未盟于雞澤戊寅及陳袁僑盟庸主具臣之偷心春秋傳之矣孟子曰以小事大畏天者也畏天者保其國通其義者非謂事大之卽爲畏也惟畏而後可事大以保國也故大功有所居大名有所當大事有所任大機有所秉秉大機任大事當大名居大功吉之所生凶之所伏凡若此者非國小人微可乘閒以攬之己其亦明矣晉之欲合吳也盟于蒲以俟而吳不應會于雞澤專使以迎吳而吳不赴葢爾之鄒介魯以通吳于晉而吳遠去其國以受盟于戚何鄒

之無忌也鄆者吳之北道魯之南鄙莒之西徼也鄆南得
吳北得魯以邀功于晉鄆乃無莒鄆南得吳西邀事于晉
滅于莒而不亡滅鄆而鄆復見猶陳蔡之滅于公穀說不足信鄆乃無魯
無莒無魯鄆不復有畏威之心矣會戚之明年剝喪于莒
不三十年而竝入于魯任天下之樞繫一時之望嫉于人
而居之已盈遠怙而近不恤不亡何待焉夫弗畏而以正
猶莫之保江黃是也況鄆之通吳通非所通以壁中原之
亂者哉小宛之詩曰哀我填寡宜岸宜獄握粟出卜自何
能穀畏者畏其不穀也巫之如晉與叔豹齒戚之會與吳
人齒無所往而不自謂穀無所往而不得亡也

聖人之言與天同化天化之細中世中書不偏不倚而載
諸用者也藏諸用無顯用矣故德行于生殺而生殺亦不
以意天之所爲易知而不可測也聖人贊天之生殺而天
不與聖人同憂夫婦與聖人之知能而聖人不與夫婦同
激聖人不憂則無以修道而立教天之道教固行不待憂
也夫婦不激則不能好善而惡惡聖人之好惡已誠不待
激也胡荊人以其子爲郢後滅人之祀而有其國與滅國
等此激論也二傳以其激怒爲聖人之激詞審然一往之
喜怒感而爲己甚之生殺夫婦與能之而豈曰游夏不能
贊邪且夫荊之以子後郢也郢之宗祀未殄郢之社稷未

屋郢之公族未降于編氓郢之宗子可與爭而特未能爭耳與夫毀宗廟屋社稷編氓其子姓嬰城力守旬免而不得者情理之相去豈但疑似之間哉況乎郢君實自亡而後莠私行焉寬郢以亡國之善詞是賈充之不宜得惡諡也有激詞則有深文有深文則有姑縱終以逆夫婦之同情拂天地之生殺躁以樂新者特末之察耳故我知莠人之滅郢也我知趙盾許止之弑君也我知鄭髡頑楚糜之以病卒也我知蔡侯申之爲盜戕也平情篤性以觀于聖人之言易知者或尙莫之測也激喜而津津激怒而悻悻激易簡以成乎險阻奚當哉夫婦有聖人之知能聖人無

匹夫匹婦之喜怒哀道之不明澤者亂之也

或說春秋曰錄毫毛之善貶纖介之惡非君子之言也韓
非申不害之燭道衛嗣君曹叔唐宣宗之蠶治此而已矣
小知詹詹大知閒閒小知者大知之賊也錄毫毛之善鄙
師鄩長之課也貶纖介之惡督郵巡微之司也春秋天子
之事而從乎鄙鄩郵微之知以此治經不如其無治矣春
秋之取舍聖人之喜怒哀也善無當于聖人之喜齊桓存衛
而有不子惡無當于聖人之怒晉文召王而有不奪故夫
善不全而惡未極者賞罰有吝焉慎之至矣乃均此一事
也此有毫毛之善而彼有邱山之惡此有纖介之惡而彼

有江河之善詞難兩顯姑無已而抑大以伸小則元德隱而巨慈逸故弑君大惡也鄭髡頑之如會小善也以髡頑之不宜于得弑而逸弑君之辜將有君而賢人戕人弑而弗治乎考髡頑之事晉非果有棄夷卽夏之志也公子申戮嬰齊死楚挫于吳而去之若驚以勢沮焉耳善固不可采弑君之惡固不可逸采之于纖介之疑似而逸邱山之顯辜申韓之學所以仍自屈也役情于一往而屈于其繼或怵惕有餘而是非隱或惡怒不返而斟酌廢曲以爲名細以爲法取新于耳目以疑天下之適從非夫敢于賊道者無尙此也故曰我知髡頑之自以病卒也二傳之傳聞

或者晉人欲以文致鄭罪而脅鄭乎以晉人之詞外之非
天下之公言也髡頑卒鄭爲晉討蔡而受會于邢邱則從
晉非髡頑之獨心而大夫之不以此弑也亦明矣

兵者毒天下者也用之而卽毒不待其多殺也行于不得
已焉則殺得已焉則勿用故曰不戢自焚今夫以毒攻疾
者無已而攻之已疾而後可勿攻則疾已而固勿攻矣畏
已救之劫也姑弗使大飲而日咀之疾固不可奪而元氣
盡豈不愚哉晉之舍楚不競而惟鄭是求愚猶此也畏楚
之毒而淺嘗之鄭以頻挑之會楚無能通半旅之爲君穀
於菟叔敖之爲相故亦貿貿往還于鄭而相報爾乃其疎

三年之內四興向鄭之師旦飲至而夕發軔車敝馬羸兵
疲將惰勞天下以寒諸侯之心而徒恩與楚一戰三軍之
眾十有二國之君卿其以資晉人翱翔之戲邪故悼公君
臣有自焚之道焉而奚啻不足以勦易曰高宗伐鬼方三
年克之憊也伐者鬼方也非故從我之鄭也三年克矣非
翱翔而避堅敵也然且曰憊則晉悼苟罄之免于亡豈非
幸與夫爭鄭者緣制楚也無求于楚焉用鄭鄭不服者恃
楚也能制楚鄭將焉往本末逆順之勢夫人而知之矣乃
疲天下于四年之中僅以得歌鐘女樂之餉是嬰兒之挫
首呼天而以易一餌也君道長臣奔命兵死于馳驅叱死

于轉饒鄭之邊鄙死于侵掠者不知凡幾矣而徒畏一日
原野之暴骨是盜蹠日備人肝而分以飼餓夫于道也仁
不足以仁讓非其所讓威而益喪其威合諸侯而卽以召
離晉自是而兵不能復及于中原合不能復行于列國甚
哉悼之以小知而墮伯業也說春秋者猶從而獎之不已
過與夫殺以止殺未聞西殺以滋殺也蕭魚之會弗獲已
而後以倦歸王者之所不忍伯者之所不屑春秋疊序其
興師之勤繪其黷也鄭人請成而不列于會明乎非召陵
袁婁之績也雖有樂黷武而憚除患者不容叛經以爲晉

悼釋

合十二國之諸侯以伐鄭始以會于蕭魚終合十八國之諸侯以侵楚始以盟于皋鼈終兩書曰公至自會未畢其初事之詞也召陵之侵無救于蔡無得于楚蕭散無終而以盟畢之信爲未畢矣蕭魚之會鄭服也鄭服而何爲未畢邪夫晉牽帥天下之君師暴露三年未遑稅駕祇以收薄賂于鄭而僅服之其以是爲可畢事也與將欲畢之入其都俘其君遷其國無已而滅其社稷于以收十二國三年四舉之威而亦僅報其大勞然而以此加鄭而固不得矣夫鄭者非天下大害之司也深伐之而不可淺伐之而徒勤繇其蕭散無終大會以解者觀之晉人之不揣以爭

鄭出困于恩威而失霸宜矣服鄭之道德緩之上也立威于楚而鄭自來次也不能于楚則固不能于鄭矣不能于楚僅能于鄭是終無以有能于楚也夫不能于楚僅能于鄭而其能于鄭者亦僅也故雖得鄭而終不敢問楚既且授諸侯于楚以戴之而長諸侯晉悼之所成概如此矣譽之者乃曰推至誠以服鄭也夫以至誠服人者固必率師天下之君師疲敝于道路者三四年而無稅駕一歇再歇姑弗獲已而收功于織芥之賄乎會而不言鄭與以伐鄭出而以會終春秋之陋蕭魚亦如其陋皋鼫也說春秋者以悼公爲復伯吾不信也無已其齒諸宋襄而可乎

小人之心惟君子知之與小人爲類者弗相知也苟弗知
之重之以疑益之以收競之以遽還相爲遽而禍極于不
已莒于魯故未有郤也一以小犯大方伐其鄙旋重師
而環其邑魯之救台台聞釋而亟破其別都禍發于一旦
兩相爲遽而惟恐不力是何其相伐之深邪台費之旁邑
也聊台之接壤也魯城費而莒圍台魯城防而齊圍成其
故一也且夫魯之亟城費與防也其非爲齊莒設明矣季
欲分魯而費城臧欲要魯而防城斯亦何與于齊莒而遽
爲齊莒憂雖然其啓疑者固在也季與臧之欲奪國也
新而居勢也不厚爲之利以陷其君爲之名以蠱其民必

將曰費城而南制莒防城而北捍齊收莒亢齊國家之利
二氏其爲國吠犬也之情也能知之者其惟君子乎君子
之審于事惟知人也其知人也惟審實也宿紇之不自靖
而費防之策不足爲齊莒難亦易見矣國無能自固則見
似而疑情無能自守則方疑而忮疑不慮忮不懲憤于一
往而不思其反故莒齊于魯兵連禍結君俘國圍咸自召
也夫君子有弗信之人而無過疑有必爭之實而不以忮
故天下方亂不與其亂內先自固可以無憂事猝驚心有
以自守待之須臾之頃小人之情形盡見而我亦可以無
忌矣夫小人之名爲攻也意不在攻也名爲弗攻也固將

攻也。以搖庸人之志而實不能佚君子之鑒。是以情窮于君子而君子不代之以受惡宿與紇也。一讎其姦莒爲之殘齊爲之毀晉爲之斂怨于莒齊而勤天下以召叛況魯襄之章昏受掣者乎。時無君子交相爲瘡猝然顛越以成乎亂。然後小人之求益讎而得益堅。魯遂分晉遂失伯齊困莒凋費防耦國與小人爲類者惡知其底止之如斯邪。

開大功者不保其終。則或起而殘之。殘其身沒其功掩其成以爲己績。雖然亦無能居也。晉悼之君臣有合諸侯勤天下之蹟。或豔稱之求其實皆鴈公之餘業。爾悼之有事

于天下者三服鄭也用吳也拒秦也厲無鄢陵之戰楚何
爲失鄭而終已無麻隧之師秦何爲見伐而不報無鍾離
之約吳豈聽蕞爾郢之命以北向而受盟悼公因之是以
有求而亦得樂荀士句因之是以執政于晉而爲諸侯雄
夫悼公固無桓文之志書假幣句之區區亦豈慮天下而
勤之邪業已推刃厲公而墮其十九之功則無以自揜而
謝國人之咎故三役者皆非悼公君臣之得已也席厲之
業竟厲之事苟可掩厲之成勞爲已績則薄收遂已而無
過望于大成亦偷心之固然矣薄收之鄭而得賄旋師薄
收之吳而退吳于向薄收之秦而械林遽返舍三方以無

成天下之去晉也亦自此始悼無成功晉無成伯祇藉手以爲權臣得晉之資嗚呼又孰知悼之資賊刃以得國者徒勤而終非固得也抑孰知欒荀士氏之終以得晉而赤其族也不祥之犯禍莫大焉竊人之功名終毀焉天之道也王之法也春秋于蕭魚不序鄭服之績于會向伐秦目士匄苟偃之專行以勞天下而顯其無成姦人之姦無可揜矣悼公沒苟偃死吳自競于南秦自競于西楚分諸侯于晉欒氏先亡苟范勢夷而趙武魏舒韓起代興于晉故曰天之所助者順也人之所助者信也履不信思不順或又起而殘之將誰尤哉

春秋之獎伯也。斷天下而一之也。伯之未興。諸侯相攻而無己。王以是而益如。將民以是而益如。焚民既病而偷。相仇王既無以翕天下而自保也。亦危哉。子曰。微管仲吾其被髮左衽矣。非僅山戎狄楚也。一朝之忿。競其民以死之者。皆山戎狄楚也。伯興而天下猶一矣。天下猶一則若存若亡。鬻鬻之聲。靈固天子也。民有輯固以存其生。民有歸固以心無妄競也。微此將。枵然自保乎。伯之名而諸侯不禁于相攻。惡用彼伯而徒以替王邪。故諸侯之復自相攻于。是乎。而伯不足獎。是以春秋亟奪其伯而一以無伯之治。治天下。晉悼之季年。迺于平公之世。齊莒邾攻魯。魯攻邾。

宋攻陳衛攻齊曹一朝之忿無所歸輯視諸齊桓未興之日爲無愈矣平公之合諸侯盟不書同執大夫而稱行人非伯之詞也後乎溴梁之會七年而伐晉之師舉與衛齒焉無伯之詞也聖人之欲治天下也益難矣王者不與伯不可用故曰天下有道某不與易也非聖人其孰能易之哉

惟固有德則乘于道者不能與爭德非固有而先喪其道乘于道者雖無德而爭之有餘蓋道可乘也德不可乘也道用天之自秩因先王之已制約亂人而俾勿甚亂者也故可乘也德非固有不足以麗乎道則恆爲乘道者之所

謂矣故曲直老壯壹因乎道晉爲漢梁之會命諸侯曰歸
侵地抑齊之彊扶魯之弱弭邪莠之亂德人之言也直于
齊壯于齊齊誼不得與之爭而齊無忌晉德雖衰其于齊
之乘因以爲德者不猶遠乎盟而其臣逃未幾而伐魯之
兵五出執邾莒而邾莒不順固齊而終不能修袁婁之已
事何齊之壯邪學春秋者比其事觀其所繇而得失之故
顯矣齊靈之悖德悖也德悖于人而道不圯于中國也會
于濮梁大夫盟上無諸侯齊之伐魯比年五出而君將者
四齊乘道而晉乘非道不相下之勢在此矣故道者德所
乘也亦無德者之猶無可乘也德者道所乘也非無道之

之可乘也魯惟爲季孟樹邑而邾莒憎晉惟爲荀偃抒怒而齊靈運道無可乘齊之德言不足以令久矣故用人情者不如用天秩用己志者不如用王制君臣父子之外無德也尊親令恭之外無直也齊繇是而張乎天下者逾三十年追乎陳氏之彊而後大挫于吳魯之益弱晉之不競又奚怪焉

諸侯之盟會征伐必親者也委之大夫而權以替國以不振慮事者之所宜尤慎也乃以此爲慮趙宋之君相收權于上而替其臣漸漬以弱國喪于金元而莫之拯通此者極難矣夫道者一致而百慮者也盡其百慮而一致通何

疑哉道之所自秩等級有體端委有緒古今遞革而一致者固不素矣盟會征伐所自出者天子也將而行之者諸侯也諸侯之臣大夫非猶夫天子之臣諸侯也三代之諸侯後世之將帥焉耳其大夫屬吏焉耳春秋之諸侯上擬天子而尸盟會征伐之制故以將行之權委之大夫而權失趙宋之天子下尸諸侯之事而替其臣使不得視諸侯以夷于陪貳自卑以卑其臣而舉國無權自天子出者諸侯之所宜躬親也自天子出者非天子之所吝而不出者也封建郡縣之殊致上下之等相仍之尊任使之道相輔之勢一而已矣知其一則下不移上不攝各有司存天秩

之不素審矣故春秋之季無諸侯諸侯上擬天子而失其諸侯大夫之所以終成乎諸侯弱宋之制無天子天子自視諸侯而削其諸侯諸侯不建則任卑賤之陪屬以與疆鄰爭宜其仆也三代之禮郡縣之權革其文必因其實以天子統諸侯以諸侯治大夫未有無諸侯而不傾以喪古今一也

同盟同欲盟也同圍同欲圍也忌齊之爭伯者晉也毒齊之屢伐者魯也以魯勤晉以晉勤天下宋衛鄭曹無怨焉滕薛杞邾狎於齊而憚其彊久矣若莒若邾又比齊以干魯而

夫惡以云諸侯之同欲哉欲之從其私而

翕于一時者雖固欲之君子不成其欲不成其欲不許其欲也欲之出於理勢之必然而固將以是爲安者雖弗固欲君子必成其欲以爲不欲而不可得也晉之勤魯非獨爲魯也天下之勤晉非獨爲晉也天下可無晉翕然從之而適成乎黨晉可無魯牽率天下以爭而適成乎誖黨以誖君子不許之以勤天下而天下固然不效其勤合諸侯之眾無怨者狎者比者翕然同之而弗得不欲天下其何欲哉不欲夫無伯之情同也晉當靈景之世嘗失諸侯矣其失諸侯也失之于楚其失于楚也先失齊也其失齊也失魯于齊而後齊抗也斷道之盟晉得魯而後能挫齊齊

已挫而晉乃以暇求于鄭而折楚是故魯之繫于晉重矣
齊西抗晉不得魯則晉蹙其戶齊南聯楚不得魯則橫絕
其聲息之往來故齊桓之伯也盟于柯而始有事于鄭定
僖公以講于櫓而始有事于楚楚之靜躁視齊齊之出入
維魯惟然晉惡得不勤魯而天下亦惡得不爲晉勤邪晉
之勤魯非魯事也勤魯以爭于齊非晉事也非魯事故晉
以大號天下而不吝非晉事故晉以大號天下而不慚天
下自爲以勤晉而以勤魯者勤之故不恤無怨不畏非敵
不敢不釋其比黨之邪心而其勤一伯且夫蕭魚之會晉
伯之功淺矣溴梁以來晉伯之勢夷矣功淺者將無以服

天下勢夷者暫一合而殆不可久也將無以服而服于其
夙服殆不可久而猶暫一合焉固君子之所甚珍而欲挽
之者也人心猶可用而瓦解未成伯之存亡繫之亟矣闢
齊之功不終天也苟偃死趙武以偷心繼之東無事于齊
西無事于秦南無事于楚舍魯不恤置邾莒不理而小國
悉離四國交戰吳越入而爲主斯役也介乎伯之將裂而
挽之者與

人心之壞其始不堪于義而犯之其繼狎于不順而忘之
其終快于不道而覆執以爲義極矣覆執以爲義則奉之
爲興建之爲名循之爲毀譽用之爲賞罰嗚呼典其非彝

名其非正毀其譽譽其毀賞其必罰罰其宜賞而人無紀
不禽者鮮矣故君子甚惡其怙于不道也始不堪于義弗
敢名言不道之爲道壞未極也君子甚惡其怙于不道則
不堪于義者宜若可矜然而君子弗矜也不堪于義則輕
犯之犯之屢則必狎之狎之熟則盈一國之心腹腎腸錮
于是焉以匪此而不典匪此而不名故夫不堪于義者之
必以怙于不道終端委一致之勢也厥貉之會蔡始從楚
春秋卽書曰楚子蔡侯次于厥貉鄒之會陳蔡背晉春秋
卽書曰陳侯逃歸蔡果怙從楚以爲義執以爲賞罰而殺
公子燮陳果怙從楚以爲義執以爲毀譽而公子黃二廢

互操以相訪毀譽無足于下賞罰無慚于上陳蔡之去人而卽禽也震霆之所不能警江漢之所不能浣矣故人心之害莫大乎不堪于義弗可以情之窮困而貫之也弗望其他日之悔而姑待也習成于偶然妄生于一念治之早而已易曰警无膚其行次且立志以循義者豈有末流之可爭哉

春秋之義不比事不足以達微言其人當罪習俗奪于勢而隱之則起特文以顯之其人未當罪習俗奪于勢而文致之則不起特文如其所文致者以暴之晉人殺欒盈鄭人殺良霄當時文致之獄辭也取討賊之詞加之盈霄君

子之修春秋無此已甚之法知爲當時之文致矣樂氏之
亡汰也良氏之亡亦汰也復入其國而不言叛惡止于汰
而無叛心其復入也固無叛事不叛而比之于國賊知春
秋之無此法也盈霄不當討賊之辟君子無治焉因當時
文致之辭爲辭加之罪者之懸章矣天下無王國無君有
得罪于執政大夫者罪視弑君之賊乘驕淫沈酗之執祿
滅人家而以利其私定爲爰書告之鄰國登諸史策廷無
異議天下無異詞此夫春秋之所深痛也痛之甚而無以
顯文致者之姦故爲如其詞以達其惡若夫盈與霄之不
可以州吁無知例也則不待起特文而自明矣里克甯喜

親弑者也弑而得以大夫稱趙弑賊也賊而不沒其世爵以殺大夫之禮殺之也樂盈良霄得罪于執政乘其汰而殺之不得以大夫稱不以殺大夫之禮殺之也奪其官絕其籍肆其尸滅其族舉國仇之盡鋤其黨擬于官官之辟極矣襄公之末伯無統官無治廷野無公是非而盈霄當罪前乎此者未之有也春秋之詞隱君子之志戚非達于詞外者不足與于聖人之微言惟此類焉耳

興不浹旬者亡不逮于望朔其所以興者卽其所以亡也吳見于春秋者七君而五以兵死一再戰而不勝國遂以亡以兵興則以兵死而以兵亡其甘兵也以之死以之滅

猶固然其甘之矣故胡子髡沈子遲卒于戰而書滅其以
兵死爲慘而凶訃之也吳子遏吳子光不書滅而書卒其
以兵死爲幸而正訃之也從主人之詞不爲之書滅以悼
之繪其樂殺輕死之心而繫之門于巢敗于槁李之後以
顯其實吳之爲吳見矣畏厭溺不弔者也爲千乘之君樂
得不弔之禍以倡臣民而獎之死故春秋之貶變夷者未
有如吳之甚者也晉乃以之爲援晉之所以不振魯乃與
之爲婚魯之所以益衰彼且速興捷亡而貿貿者猶恃之
困于石據于蒺藜不借之以捷亡者其猶幸夫
衛甯喜弑其君剽其君云者喜之君也衛殺其大夫甯喜

其大夫不當歸侯初之大夫也皆其君則弑者服辜經其
大夫則殺非謂賊矣則不可以爲君者也毒不可以爲大
夫者也故喜之迎衛正也衛不殺而亦以私勞而廢公法
也然則衛與魯何如抑可以免乎夫不死于本而免于末
未有能勝者也故爲節計者視之死知剽之非所當計則
弗君之焉可也舍其家而亡潔身而不知其餘正矣蠶之
上曰不事王侯高向其事許穀離者也棄剽不事從衛于
夷儀固以與之俱入可矣比之豢曰不隨方來得所比者
也抑斯兩者則喜可以不君剽而抑可以不弑矣爲衛計
者喜之許迎已也正名甯氏之爲賊弗納而自求入焉正

矣詩曰無縱詭隨以譽無良詭隨人命詭隨己無良一也詭者之隨若將沈己而不可縱也受甯氏改過之請使全剝而以公子處之可矣詩曰君子如祉亂靡遘己以祉已亂未聞其以禍也爾斯兩者喜固不得爲賊而衍亦可不殺矣故介于亂反于正去于禍從于福斟酌于原始姑爲忍待而弗遽非君子其孰能免哉喜怙其九世之卿不忍于寵祿而求以蓋遂君之惡則惡益劇衍沮于十有二年奔竄之苦遽欲因不正以反導人爲亂以假之權逮其末流喜雖欲弗君剝而不得衍雖欲以賊討喜而固不能矣正其本者理不可據先過其欲欲據于中理以爲名于

外虜其故采其韓將誰欺哉
惡禍無以爲藉其惡不其流其類至于弑父與君如各在
名也名不可以意收故民不可以有悅事不可以狎靖則
不可以遽已遽已其禍猝靖其事苟悅其民此三者遽名
者之所乘也夫天下有兵連于二百年而可以一旦弭者
乎二百年不解之難一日姑弭之若于後者之不審而悅
也若病與熱者之授以冰也雖益其痛乍悅之若于是而
以事靖禍已爲之功而大名遽歸嗚呼孫綽王羲之之以
沮晉泰槍湯思退之以誤宋使無名綽義之何以得爲名
士槍思退何以言出而上下靡以從邪宋向戎之惡浪王

迹裂伯統亂夷夏啓紛爭俾無名焉亦矣至此哉夫向戌
者惡能以其意取之名動天下乎孫綽王羲之固嘗欲以
爲名矣而不能兩向戌捷得之一旦夫向戌惡能以其意
取名也楚之謀深陽餌而陰用之故利用其邪說趙武之
志偷欲以弱晉而自保其力故樂假其諛詞而小國之君
三晉之氓且如炁熱之得冰益其病而不恤乃相率以獎
成之名戌乃以名報其意而綽羲之力爭而不得者一旦
而捷收之矣自是而後八年而楚奪諸侯以爲盟主率天
下以蹀血于東方十二年而滅陳十五年而滅蔡炁熱者
得冰而疾可益也乃諸侯尋于楚陳蔡滅于楚趙氏乃以

罷外兵專內圖蠱其君狐媚其民漸漬而晉移于趙授吳
熱者以冰聽其病以死而我且有其望也楚之詐趙之姦
成乃以爲名于一旦烈哉名之爲害莫之拯也檜思退之
俎豆綽義之之餘也綽義之之宗勅戍之系也名之媚也
有源流焉民速悅之事速靖之禍速已之故舉二百年之
難若已之一旦而□□□□□□□□不旋踵之患陰陽
之用生殺之數惟其邪說以莫之紀禍開于春秋之季桡
于東晉之初極于南宋之世惟向戍之爲名俾以有名焉
耳夫邪人之爲名爭之也無如其沒之也爭之其名競沒
之其名亡故春秋兩以宋地而不登向戍之名于武建之

列若曰趙武自偷屈建自詐也宋介其衝不得辭焉非成
之所能尸也奪其意取之名而弋名者寒矣綽義之言焉
而莫聽檜思退乍讎而天下謫之聖人不與邪說爭名而
名乃正殆猶天平殺物不以威而物自燔矣游夏之所不
能贊其諸此與

道之誡也成乎邪邪成乎亂以衛鮪爲信以靈輒爲義以
伍員爲孝而大亂極矣衛侯之殺甯喜過不在殺也政繇
甯氏祭則寡人衎不喜殺衎將續剝以死卽弗死而衎移
于甯矣且喜固北面事剝一旦志移于衎而推之刃功雖
在衎私勞而已已發之罪弑君之賊也未覺之惡移國之

賊出國賊固然其可殺也如鱣之志懷其私惠保賊爲臣
舉國授之喪先公之守而鱣乃以不失其信安于蕭而爲
卿是鱣幸而喜殺以弁也匪然鱣之不爲華歆褚淵以終
者幾何邪故鱣之信不足爲信也背公死黨匹夫之諒而
已矣若夫鱣以失言爲病何病之晚也善保信者可生可
死而不可使爲亂衛侯之介鱣以命喜命之以弑也而其
辭曰政繇甯氏之二言者道之以逆許之以竊君言之不
君臣奉之不臣友將之不友嗚呼惡有與其臣言使弑其
君擅其國而可以信守者乎苟息之不食言殉君也鱣病
失言怙賊也始之不擇繼之必保苟息且有白圭之傷而

況鮒乎春秋書曰衛侯之弟與宋辰秦鍼均惡其挾少信
殉匪類忘君親而賊恩也穀梁子謂鮒之去合乎春秋吾
未知奚以合也

春秋天下之公史王道之大綱也以事存人而不以人存
事事繫于人以事爲刑賞而使人因事人繫于事不以人
爲進退而使事因人人之臧否也微事之治亂也大故天
下之公史王道之大綱不以人爲進退劉絢氏以不施殊
詞于吳札疑于貶札非篤論矣聖人所取若管夷吾邈瑗
史鮒國僑不假事而著其名于春秋聖人所惡若臧孫辰
楚申不因人而託事以貶于春秋書其得失一因其事而

無溢詞故子曰斗筭之人何足算也言其不足以當於士
道之大綱也然則札之賢不得因其來聘以爲之特詞義
繫于聘而不繫于札其與椒術同科也何嫌乎札之異于
椒術哉且君子之責人也至于賢而止責之以賢人企聖
矣責之以聖人趨狂矣賢者之自靖也盡其道而無憂盡
諸在己可弗憂矣憂非所憂道先荒矣故君子不以聖責
人聖非可責者也知然札何足以君吳而聖人奚以君吳
望札哉藉曰叔齊之德不越伯夷諸樊兄弟賢不逮札將
使伯夷季札各操自賢之心以酌君父之命爲公爲私而
天理亡矣且僚之愚光之狠伍員鱗諸慶忌要離之流挾

雄桀以喜亂而札乃恃自賢之心排嫡系以自立亂不發
于僚而發于札爲達節之言者不能任其無咎也僚光之
亂不自札開札惟爲僚則身名交墮進以希聖人之權退
受黔牟叔武之禍札且親以其身而爲戎首安得以積仁
之岐周戴季歷而晏然者望窮兵樂禍之句吳哉故君子
之于札無可議也札之于父兄之命無可屈也微子去紂
商滅而不損其仁句吳兩世之難天也于札何尤邪札無
可貶春秋不因聘以貶札如實而書從乎椒術之例說春
秋者無所容其鑿知矣嗚呼達節之興而踰矩以爲聖邪
說之有枝葉也而人無固志東晉之士薄井丹而尚相如

故中原陸沈而篡弑相紹禍亦烈矣秦檜善無常師之說
用此知也李贊之獎譙周進馮道祖此術也君子好辯以
爭而不得佞人片言亂之而有餘綢游二程之門不思而
淫入焉亦爲不善變矣

札終辭而不君自靖之仁也爭弑之禍咎始于壽夢之失
正道失于諸樊之虛讓禍成于餘祭之妄立札無咎焉若
然則札無議乎以君子而議札其惟諸樊死餘祭立之日
乎諸樊之始欲讓札也非道之正而猶父志也札不從諸
樊乃傳之餘祭以及札是輕宗社亂典章而其爲謀也亦
迂矣札于斯時昌言其終不立之心以息餘祭之妄革諸

樊之命而固請立光是仁人孝子慟哭力爭之日也而札
文弱而不能易曰介于石不終日一失其幾欲成乎介而
不得矣夫諸樊舍子以崇讓札不可以言語爭也餘祭非
次自立以冀傳之札札可以言語爭者也彼卽有迂曲以
傳季之心其能曰吾必欲立乎其位以舍光哉如其執而
不我聽也札逃而去之得矣札逃而餘祭無可傳無可傳
而餘祭固無辭以自立餘祭避位以立光光立而札返焉
順也光終不立餘祭且傳之夷昧終身不入吳國焉可也
不失其身以事親猶承志也待之夷昧死僚篡立而札已
無可爲矣況僚立而札猶不去好仁不好學其蔽也愚札

所然能解矣諸陳之謀也迂餘蔡夷誅之妄立也僻僚之
無忌憚也狂光之思得國也固札以嫌疑之身立乎其間
而札亦危矣哉其僅得爲君子而幾不免于同汚也乃欲
以天地之德聖人之中非常之事實之乎抑又何足以當
春秋之進退哉

春秋家說卷三上終

春秋家說卷五中

船山遺書十四

衡陽王夫之選

昭公

審于聽者惟同異之辨同異之精臧否乃正善聽古人之
言者知其有互形之詞焉知其有觴立之辭焉說春秋者
貴王賤伯王之貴以伯之賤貴之也伯之賤以王之貴賤
之也觀于伯而得王之貴因以貴王觀于王而得伯之賤
因以賤伯此互形之詞也王之貴貴于伯非僅貴于伯即
無伯以視無伯之亂世尤貴矣伯之賤以王賤之既無王
以視無伯之亂世伯弗足賤矣此觴立之詞也奚以明其

然也既無王抑無伯能賢乎有伯之世而足貴邪則君子
之于春秋當其有伯宜冀其無伯不靳其有何也
如伯之賤自古而恆賤加王之貴亙古而恆貴則終不願
天下之有伯矣然而春秋弗然于有伯也固有寧矣尤有
于矣于無伯也匪直不幸之也尤憂之而靳之靳其尚有
也故蕭魚之會伯之終也宋之會趙武自絀其伯以讓楚
號之會楚抑晉而列之諸侯晉欲救莒而不敢自尸天下
固無伯矣而春秋弗忍焉以昔之伯伯晉惟恐中國之無
伯也則春秋之不幸無伯而弗賤伯于無王之目聖人之
情亟矣夫聖人豈于其所賤者而爭之必有哉故曰伯之

賤以王之貴賤之猶夫王之貴匪徒以伯之賤貴之也王
至貴也伯非至賤也君子之所尤賤者□□而主□□大
夫而主天下狙詐興滅亡相非處士橫議封建大裂之天
下也故三晉陳恆賤于五伯秦儀衍軫賤于巨室陳涉項
籍賤于處士劉淵石勒賤于匹夫當其賤思其貴當其尤
賤思其所不貴君子之情也執一切之見不審于互形觴
立之微言臧否亂世教不立天下無統讀君子之書而趨
入于惑不審而已矣

王之既衰伯之未興人競天下惟力是求伯者亦以此而
起齊之未伯先求之乎紀陽譚遂晉之未伯先求之乎霍

魏戾號以此而伯亦以此忌天下之競求而懲之故伯事
成滅國取邑之事爲之衰止魯襄之中年晉不得志于楚
魯于是乎取邾晉伯已失魯于是乎受邾莒之叛邑爭鄆
滅郕猶夫齊晉之未興莫之懲也而晉亦不思其言曰疆
場之邑一彼一此過則有刑猶不可壹舉魯一國而他國
可知已夫伯以相并而成王之蠶也伯成而天下莫相并
王之救也晉則已失伯矣魯亦大東之巨邦也始于蠶終
于救安在其不可望魯以齊晉之事哉晉之言曰卿主齊
盟其又可壹乎是已虛左延魯而授之主惜乎魯之無以
堪此也周禮在魯魯可以王而不能晉蓋其伯魯也

抑可以伯而又不任昭非其主也季孫宿有雄心而不受
命也疆魯以自疆宿死意如踵之則惟恐魯之不弱也嗚
呼趙武之欲竊晉也替晉以自保宿之欲竊魯也疆魯以
自張弗之獲已宿其猶賢乎武替晉以自保外竊齊楚而
惟私是求不競物者物不競焉而趙氏安坐以收晉宿疆
魯以自疆見思于齊晉而意如又墮其功內外交誦無不
誦也季乃終以不得于魯謀益工者術益不武之盜晉肘
腋之偷而已矣惜乎季孫之可以乘之而終弗能乘也
中國于夷狄弗言戰晉戰楚齊戰吳猶言戰者□□□□
也非□□則不言戰不使□□之得□□□□也與□□

則□□□不能□□則隱其戰公追我于濟西□□□
僅書其追所以□□□□□□□□也戰者交綏兩可爲敵
而不相下亢詞也□□□□而冀其自彊譬之射虎者不得
虎則不足道故□□□□□□□□不能敗之抑不足道矣
書敗者誼詞也是故知□□□□□□□□殄之不爲不仁欺
之不爲不信斥其土奪其資不爲不義苟與戰而必敗之
也殄之以全吾民之謂仁欺以誠行其所必惡之謂信斥
其土則以文教移其俗奪其資而以寬吾民之力之謂義
仁信以義王伯之所以治天下匡人道也故齊晉之伯成
于制楚春秋許齊晉之伯則因其制夷齊□□□□救邢

或乎處之果弑炆精燬之知述于後世而傳以世述時
安所得舞文之知以治春秋至此極也趙盾賊也而曰見
忠臣之至許止梟獍也而曰見孝子之至髡頑自瘠糜自
疾陽生自天而加大惡于臣子以他爲之辭必如是以學
夫春秋不如其無學之愈矣何也仁愚則戕仁義賊則賊
義知繫故惡于知信不足有不信則以叛聖人而焚天下
之大經誠不如其無學也

世子與于覲會之事下其君之禮一等宋公也世子下視
侯也申之會降乎小邾而從淮夷楚滅宋矣故禮者自理
者也自愛人斯愛之自敬人斯敬之希人之愛而恃足以

當人之敬是以愛敬任之人也苟任之人愛與憎敬與慢
莫能必矣夫任人者莫之自必而況于匪人者乎宋之盟
虢之會導晉以諸侯授之楚宋之爲也昔者楚與晉爭伯
而恆阻于宋楚以之兩爭于宋宋困而不爲下楚乃以疲
楚故重宋急宋宋一旦折而合于楚且爲之大致天下之
諸侯是足以當楚之重矣足以當楚之重敬可恃也楚所
不欲弭者兵而姑與晉弭之楚情見矣晉持其北吳餌其
東不弭于晉弗能東向而治吳也輯晉以得諸侯乃大會
而馳師于江介楚懷此亟矣懷之憤盈而重爲之辭探其
意成其欲緩其北顧併其東力乃宋成之也宋爲楚舌而

利導其心愛可希也乃楚既合晉而宋固爲弁髦矣楚大
得諸侯而宋亦腹囊矣楚探宋希愛恃敬之心而情盡于
宋矣故恃焉而不敬希焉而不愛世子與于會而不敵附
庸之小邾此奚怪哉且非徒敬之弗可恃愛之弗可希也
楚得徐滕頓胡沈鄆而賓淮夷是卽宋戶而奪其鍵也愛
不足則憎仍之敬不足則慢先之微楚虔之死宋將不有
其國求如昔者之兩受閼而將不得兆先見矣希愛者得
憎恃敬者得慢偷安者得危天下莫賤于偷此之謂矣且
夫楚之重宋也惟不得于宋也其不得宋也非宋之固能
寡岸也楚越陳蔡鄭許頓胡滕鄆而攻宋則力窮于遠馭

晉且必爭而久頓師于宋則情憊于孤懸將欲北收宋而
吳睨其東則勢危于中折夫既已合晉制吳而東諸侯之
惟其命矣順其脰味以啄宋猶右臂之伸也故幸而吳之
不易舉爾晨下吳而夕軍宋晉不能收已渙之諸侯以與
爭敝宋而返席卷陳蔡鄭許以北疆河上申之會楚人之
欲天下之勢已大概見矣其馳騁也將自宋始故慢之憎
之蔑其班序以挑之于是而宋始有悔心故自是以後宋
日遠楚而不敢親昔以恃敬昔以希愛惟恐不得也道乎
不得以履危機則雖施之以愛敬而不敢受夫至于愛不
敢希敬不可恃大爽其初心而後悔賢賢者之恃人以自

喪親不亦哀乎是故君子以自不敢慢而敬人非敬人以
恃其敬也自不忽薄以愛人非愛人而希其愛也不恃敬
天下不敢慢不希愛天下莫能憎忘天下之愛敬而天下
歸之事不相待而道成焉取之已而已矣乃君子之爲爾
者將矯持天下以逆操其情乎而抑非也自敬者非其亢
之謂敬其天而已自愛者非其吝之謂愛其道而已天以
臨天下弱不姑彊不吐也道以撫天下來不睚去不驚也
天之所秩因尊以尊之而已不卑天之所叙因親以親之
而已不孤君子之所尊親者以其類君子之類無小人天
尊之矣□□□□□天親之矣類斯同同斯順順斯

辨辨則拒非其類而不嫌于異異斯攻攻斯服故君子希
道以恃天而天下服惡知天下之愛憎與其敬慢哉小人
之附于道也不然以道見重不見道而惟見重見其重不
復見道知以人不知以己見其重因而任之知以人權去
于已而人司之名喪于前實毀于後毀焉而後悔困之動
悔有悔也宋之不終戴楚而存也毀焉而弗悔且聽命于
人以自傾蒙之見金夫不有躬也陳蔡頓胡沈許之終于
亡也貞淫之幾存亡之致豈不辨與故曰天之示人顯道
惟彰君子不謀吉而吉无不利無已抑凶而不咎天祐之
矣

申之會不與諸侯在會之諸侯曰曰然則齊魯衛
曹邾莒與于曰曰會于號弗會于申以爲猶賢矣齊姜
于是而假之討魯固且率親江楚而衛曹邾莒可知已其
得免者弗獲已爾猶知避乎大惡則三之所以无終也陳
蔡許之役于楚若陳與胡沈弱而不足以擗滕小邾從衆
者也然則申之會春秋所亟擯者宋鄭焉耳乃衆鄭之合
楚也于是而甚其離楚也亦于是而始國伐吳而不與從
會乎厥然而不疑復之初曰不遠復无祇悔爲復之初不
尤賢于剝之三邪而又何曰曰夫知人之慧與德人之知
有近似者矣知人之既知亦反而合諸正也反合乎正殆

乎德矣乃知人之反以擇利而反正固利而利乎正也德
人之覺不安于不正而正以爲道道必利而非以道利也
道利之分人禽之別謹之矣宋鄭之合楚利焉耳矣己不
從于伐吳而亟受盟于厥懋利焉耳矣其利也適值乎道
道斯利也乃其道也惟利斯道非以道也非道者悔數悔
而不定者也楚陵汰伐吳之謀失陳蔡許顓胡沈闔宗楚
而亡將及之宋鄭南响之初心弗獲已而少革迫夫伐吳
之果不足以逞陳蔡之相續以亡楚虞之不保其終乃以
自矜其卑覺而離之決裂命楚遂并吳虞無內據從容挾
陳蔡以求之宋鄭于產肉戍之區區將匪過是悔而悔其

悔斯何足以當復初之盛德哉無當于後而亟從于剝固
不若齊魯衛曹邾莒之猶有憚也鄙哉特知而知者之徒
爲黠也從淫而害有幾則悔其淫從貞而利不逢抑悔其
貞長年有覺長年以迷長年以悔誰與原而赦之

賞有所裁罰有所止如其適上者而輕之未有不逮者矣
如其適上者而重之層累而有不勝者矣賞極于侯罰極
于死莫能增則亦莫之增也周公相武王以有天下成王
幼公殄商定周禮致太平相武開周之功視太公而均賞
矣殄商定禮公勳有加焉其封也儉于百里而與齊均賞
之所裁適上而無以加也加之以禮樂而子曰周公其衰

矣莫之裁而逼乎上不勝上也以非常之功有必裁之賞
用同而不用擗況夫罰極上刑層累有窮而不可加者乎
層累有罪罪其重者適上之極也重者服輕者置從重以
止也均乎上刑而使卽乎一勿兩罪而一刑君子不黷怒
也均乎上刑而卽其一何舍乎何卽乎罪有公私因其人
因其事歸所重而已矣楊氏之徒非必能孝而但責之曰
無君墨氏之徒非必能忠而但責之曰無父治以天下之
教不服治其私也楚僭王而變夷中國之大惡也弑君之
賊諸侯戴之亦大惡也從乎僭王之與弑君弑私罪也僭
公罪也私罪視公罪而尤嚴則以私罪服刑一國之案也

從乎從僭之與戴賊戴賊者有畏而陷私罪也從僭者無
忌而逆公罪也舍其私罪而治其公罪天下之案也故使
楚虔而弑君之賊與討其罪而勿之從楚臣子之責也楚
之臣子不能討而始以望之諸侯諸侯不討而戴之罪列
于楚臣子之下而末滅矣若楚僭王以變□□爲之臣子
者固弗能治且相仍而戴之亦情也使之主盟以令中國
諸侯之專辟也舍諸侯之專辟而使卽乎末滅之刑以增
重焉然則楚虔不弑而可戴之爲盟主乎申之會不殊淮
夷以□□治其從僭而非治其戴賊審矣從僭之罪蔑
以加也斥之□□止刑極于死之說也從僭已適乎上

而抑又加之以戴賊猶之乎其弗加也從僭者口加之戴賊而猶然口怒黷于己而無能爲庸謂于勢何如其折于理邪顧置其從僭而治其戴賊欲增之乃成乎滅之猶夫加周公以天子之禮樂而祇以辱公黷喜無勸黷怒無懲君子弗繇已天威天福天險也天險不可升升者墜矣故刑極于死罰極于口天下之公罪口于僭王而口口虔卽弑諸侯不更坐焉況乎楚虔者固未嘗弑君者也春秋正楚子麇之卒于前罰戴楚之諸侯于後大義各設炳如日星徇傳之深文屈聖人之大法刑黷法亂惡足以治天下哉

史克之頌溢頌者也顧其詩曰居常與許復周公之宇邇
域正侯度猶存焉莊僖之盛魯無人地也襄昭之衰併邾
與郕受漆閭郕鄆水于邾受邾郟防茲牟婁于莒孟子曰
今魯方百里者五皆非其力取之時蔽而坐收之也惡莫
大于滅人之國而或必有討罪之辭其猶可以居之矣惟
夫謀之也不以知奪之也不以力受之也不必有名于是
而諸侯之爲盜無忌也無知者謀之而亦獲無勇者奪之
而亦保不必有名瓦解以授之人而不敢爭于是而小國
之不自立也亦甚矣小諸侯無以立大諸侯不忌于盜尤
大之諸侯愈以多得而無厭無度者無侯封建之不毀何

待焉春秋書三叛人其詞直其刑嚴瓦解之勢卽文而顯
與魯以該天下而天下可知已

會申之役楚長諸侯以伐吳伯詞也號舉淮夷而不殊猶
未純乎伯詞也明年楚再帥諸侯以伐吳徐越稱人以進
孰進之楚進之楚純乎伯矣春秋之爲之伯詞諸侯之伯
之也非諸侯之能伯楚晉授之伯也晉授伯于楚而後楚
得肆志于吳晉授吳于楚而後楚得成乎其伯成乎其伯
而後諸侯弗得不伯伯詞成矣故中國之授夷狄君子之
授小人授之利弗可授之權授之權弗可授之義義以立
權權以收利利不損名權不損道雖君子弗能奪之況

人之僂從者乎吳之于中國也毀衣冠殊言語異飲食別
好尚義之所必懲者也故楚伐之而義授以義而欲損其
權授以權而欲分其利必不得矣晉不得爭諸侯不得拒
春秋不得奪斬乎楚之但以伯也春秋之爲之伯詞猶若
有幸焉而聖人之心迫矣

奚以知貶毫毛之惡揚纖芥之善非春秋之通旨邪貶毫
毛之惡爲無惡者言也既可無惡而猶有毫毛之惡君子
之所惜故貶揚纖芥之善爲無善者言也不望其善而猶
有纖芥之美君子之所矜故揚齊桓卽諸侯之師以侵陳
貶毫毛也楚子殺陳夏徵舒揚纖芥也若夫大善大惡之

司爲天下之所盛衰猶且取凶人之纖芥而揚之擿君子之毫毛而貶之猶薄以行喜怒非君子之所庸心而規以求春秋之旨難矣晉與楚有分天下之心故授吳于楚授諸侯以從楚而攻吳楚東向淮海而晉乃以北啓中山南北裂天下之大故也伯之所自毀王之所自亡中國之禍所不可百年定者也春秋于此窮趙武屈建之情達衰周不返之勢進徐越伯楚而狄晉其義大矣逐虎者失鼠弔死者勿問破盂猶且取毫毛擿纖芥以窺君子之喜怒胡屑屑邪吳之助慶封也且不如楚之助魚石也助魚石無尤貶之詞知不以慶封故而尤貶吳矣楚處之幾慶封不

如其殺蔡般也殺蔡般無矜美之詞即不以討慶封而善楚矣楚醢其慧吳之心而會有慶封之事虛据其偶執之名以進退吳楚則是受楚欺而責吳者已細矣故知進楚者伯楚也外吳者成楚伯也成楚伯而後成晉之狄晉亦一伯楚亦一伯楚亦一狄晉亦一狄矣狄晉則無庸于伯楚伯楚乃以知狄晉之繇大善大惡之司天下盛衰之際創鉅痛深君子不得已而起特文焉非細人之所知久矣慶封之賞殛有司者之治也春秋天子之事有司也云乎哉

平者前有不平也夷儀之役解齊景公立魯與齊同與于

諸侯之事者三齊兵不西魯不東戒十二年矣固無不平而何平邪故暨齊者非但平也齊亟收魯而魯不聽晉也春秋之書平皆有天下之大故焉鄭輪平鄭始離魯于宋而齊伯肇宋楚平楚始收宋以講晉而楚墮晉伯之謀成暨齊平齊始收魯以離東諸侯之西向而晉伯遂不可復故魯無狐壤之辱易子之尼無怨可釋而以平爲文曰自此而勿以晉問齊也故魯之結齊也雖不能保而棄晉也繇是而卒不得合魯棄晉東諸侯之棄晉無遺矣故厥慙之會晉欲因諸侯以謀蔡而莫之聽平邱之盟以兵脅之而眾愈攜乃春秋之紀平非甚不與之詞也齊收魯以亢

晉魯釋晉而合齊伯事敗中國分矣春秋之事齊桓晉文
將獎伯以聚天下而糾其亂敗伯以相黨而胡弗甚不與
邪嗚呼昭定之際聖人欲更爲諸侯謀伯而不得矣晉無
伯功無伯力而更無伯之心也無伯之功中國滅于楚而
不能問無伯之力睨諸侯之瓦解以去而若無知無伯之
心趙武韓起魏舒之心路人知之矣志專內竊畏名義之
相臨舍南圖北竊中山以自肥也□□□□而無與問
則弗已而聽近者之相保諸侯瓦解而若無知則卽欲睨
之而彼不受執政之心利失伯以移國則義不可爲權姦
之私人故爲魯者婚于吳覲于楚屢辱于晉抑不如其平

齊之爲得矣王之不王不如其協以戴伯伯之不伯不如其離以救亡聖人與天下同憂患而乘于時逮乎昭定以降而春秋之志隱矣殆乎不可爲矣權衡之大用不能一概以施而用之也密子曰吾其爲東周乎非聖人莫能爲也聖人弗爲大賢以下且無以措其手足顏閔終老于布衣以此夫

謀國家者謀之以其安禍之徒也謀之以其危福之徒也日謀其安則戒匪人之比也必甚故夫恃國之恆固恃子孫之恆令以之危而不亡者鮮矣此亡國敗家者之以禍發于猝內潰外偏轆于一旦抑將歸咎于天而不知其皆

人也介楚圍之方得諸侯以將大會而逞其欲蔡厥于是而弑其君圍道楚圍之已得諸侯將大有事于中國陳滑于是而假其弟以殺其冢嫡故楚之滅陳有機滅蔡有首不自其先不自其後裨竈竈莫叔肝國僞之以小知言天繇此始也春秋諸侯父子君臣安忍以相戕賊或討或逸而國不必亡豈獨陳蔡之宗祧爲必棄于天哉故曰不恃國之恆固不恃子孫之恆令以之危而不亡誠以國之固子孫之令謀國者之所深願而不可恃也君有凶德而亂卒定國有賊而或爲討以靖之魯莊得之齊桓晉獻得之秦穆曹伯廬得之晉衛莊公得之陳夫固有其不傾之道

矣故曰非我類者不入我倫爲我倫者閔我災不入我倫者幸我災固其恆也故畜鯢者勿納鱧字雛者勿養鵠不恃其鯢與雛之工游而善匿也蔡白厥貉以來陳白會鄆以後授命于楚游羿之穀中而逃之久矣國無恆固也子孫無恆賢也蔡固獸行于房閭陳溺湛愛于牀第而國已懸于楚之吻何從得媼姬宗姓顧義之齊秦陳晉而與憂其不弔邪黍離之詩曰悠悠蒼天此何人哉外有犬戎之相乘而後伯服足以亡周不然宋劬之逆唐元之忍父子喋血而無或奪之何天之獨甚周邪

春秋之紀陳亂也其詞詳詳以閔陳而莫閔乎陳侯溺之

卒也廢假節溺志也局招以立聖溺命也招奉溺命成溺
志然而溺終憂患以自殺嗚呼一往之夫始之以一往之
志假手不可恃之姦人志已露命已移雖欲止其燎原之
勢而不可得則惟有憂患以死而已矣故夫天下無可恃
之姦人而尤不可恃者姦之在兄弟嫺嫺閒者也乃君子
處不令之周親豈必厚疑之而固絕之哉其猶可養也命
之必正而導之順也故曰中也養不中才也養不才無棄
焉無疑焉之謂也其尤姦也不可養也有弗命而命必正
也故曰烝烝乂不格姦勿使得有爲之謂也悲哉溺之愚
也天下有與其兄弟謀殺其子而能保兄弟之不相偪者

乎殺子之志已露于兄弟則兄弟習我之忍而胡弗相師以忍殺子之命直授之兄弟而不忌則兄弟且忌我之忍而胡弗先我以忍已使姦人窺我之忍則彼灼然早知我之不可終事而我猶恬然相倚以其謀其宗社迷者日迷猜者日猜身不死國不亡其胡待焉偃師殺溺恚以死畱奔過受戮招乃逸罰于越故莫閔乎陳侯溺之卒其弱不可瘳其禍不可弭也

稱陳侯之弟親愛之詞也親其所固親愛其所必愛陳侯之于兄弟未有過焉而嗣子殺身恚死國旋以亡何也非陳侯之不宜親愛其弟陳侯之不宜親愛其姦也以弟故

愛之雖姦而非保姦以姦故愛之雖弟而非友弟天下有
與其兄弟謀殺其子而恬然不疑其忌我者乎則天下有
兄弟命我以殺其子而可受命以無拒者乎必拒而不拒
非姦人孰能任之招自任而陳侯推心焉故曰保姦非友
弟也是故命之殺人而不應者其忠易見命之殺人而力
任之者其姦易見惟庸人則不然恆忠其所姦而姦其所
忠志已不可戢命已倒持而後恚忿從之自斃速矣嗚呼
不得有道之子臣而與屬焉不得輔仁之弟友而與交焉
必也與之謀非常之事而不違命之以非望之功而不居
志所欲爲率與同爲而不應己所好而猶爲發其短己所

惡而猶爲稱其善者乎易曰或出或處或默或語言其不
相比也用其道則蠻貊自効反其道則兄弟爲姦招之恣
行而無忌也陳有骨鯁之宗臣猶弗敢也陳之無人也溺
之忠其姦而姦其忠已久矣

有哲人之愚有愚人之哲愚人之哲亦甚便矣楚合陳蔡
鄭許以圍宋魯遽往會之楚滅蕭以偪宋魯遽往會之楚
因陳亂而滅陳魯遽往會之僂捷之甚便魯數用之而無
勞再計所謂愚人之哲甚便者也楚挾大欲以睨中國疏
不加怨親不加恩視其力而已矣力苟未足卽深怨如宋
而取平以旋師力苟有餘陳蔡日扣其廷而數墟其社然

則魯高枕山東而楚弗能以一矢相加審矣挾走權之心
乘趨時之捷足無能自固因以之靡故甚便者愚人之哲
哲益愚也楚虔無道以興其興也倏焉倏以興卽其遽以
燔者也魯則君執玉大夫將賄棄疾立而自戢封陳蔡以
謝天下謝天下非忘天下也魯則君無南轅臣絕行李故
夫愚人之哲亦豈其善走權而疾趨時也哉震以一旦歆
以一旦一旦之乍炎魂褫神游而速去之也亦如枹歌而
鼓瘠嗚呼處無道之天下而欲爲君子其亦難矣道之據
不如勢之張志之大不如氣之盛夷之彊不如表之榮非
夫善世而不伐不見是而無悶者惡能與浮沈之流俗相

迎隨而弗喪其守者乎甯棄疾之寥寥也勿庸虞之奔走天下也愚人無所用其哲而已乃全詩云無然歆羨此之謂已

春秋書楚人殺陳夏徵舒許之討賊之詞也書執公子招誘蔡侯般執世子有不許之討賊之詞也招殺世嫡恚怒其君而不去其公子般弑君父而稱侯子稱世子不干其討自言其賊賊非楚子之得討矣臣弑君子弑父凡民罔弗慙者人之大倫存焉而非我類者不入我倫不入我倫人倫之善敗非所治也非倫者而治人之倫人道息矣故君子之惡虎豹蛇虺也甚□□□□□□也甚□□□□

□□者爲其變□□□也惡亂賊者爲其變□□□
也已變者甚于將變者不待變而固然者甚于變者彼已
固然而猶責人之將變而類已憯不知者且許之以義名
要豈可以欺君子哉非若楚莊之退安于伯志討賊而不
有其國必弗爲之假借之詞君子之不可欺也以此立教
不善變之臣猶取討賊之名□□□□□□而人道遂滅
夫乃知春秋之所憂患遠矣哉

楚人執蔡世子有以歸用之世子無降伏之道見執而死
以爲世子之道得矣有之爲世子之道未得也有固不可
以爲世子也故春秋以用有目楚人之惡而弗爲之死難

之詞以隱恤之臣弑其君在官者殺無赦子弑其父在宮者殺無赦況有爲般之世子哉世子乎般亦般而已矣然則爲有者將何居景公弑之日有有知焉死可也幼而無能死長而遂志以引決未晚也弗獲已而不立乎世子之位逃以去猶之可也般者天下之所不容不得以食乎蔡之宗廟有立則般祀貪得其國而祀元凶于先人之廟以夷先祖乎大慙蔡仲之鬼不如其餒矣故國之存亡非有之事也有弗獲已早逃其位國人求景公之別子以嗣其先俾般之罰正于死後有之所得爲也有爲般之世子而有惡矣愛死而死不可免貪國而國以亡書曰用之楚惡

而有賤君子之所弗恤也

有受治者以天子之治治之故貶其爵微其人陋其事曰
言其所爲惡舉凡滅仁禮去信義者用此法也有不受治
者然後以王者之不治治之則爲之號舉故戎狄荆吳之
舉號號非罰也貶絀之所不加示不相統焉耳以法治諸
侯以不治治化外故曰春秋天子之事殺之戰號舉秦許
之伐號舉鄭鮮虞之師號舉晉曰彼且于宗周未亡之天
下自國其國我不得以諸侯治治之矣故殺之狄秦非謂
其貪利蔑親也衛貪邢以滅同姓而猶生名以治之也伐
許之狄鄭非謂其附楚也陳方會逃歸而卽楚猶目其事

以治之也伐鮮虞之狄晉非謂其詐也獻公給虞公執而滅之猶稱人以治之也惟之三役者天下離合之幾宗周存亡之故封建興廢之絲繫焉窺宗周流天下以廢封建則不得爲中國之諸侯矣不得爲諸侯天子所不治彼自爲秦爲鄭爲晉非我侯氏猶荆吳戎狄之爲吾敵也自穀之戰秦于是而東爭豫土周不保其鞏維之勢始于此矣自鄭之亟伐許天下遂顯然以不從楚爲罪削周之東援啓楚之北道南北分疆之勢成于此矣自晉之數有事于鮮虞盡捲河北以分天下而伯者彌縫中原以奉一人之勢解矣故昔者弭兵之約向戌之說已陋而聽之速楚圍

之相辱已甚而居之安晉分天下之心目移于中山冀代之閒委南諸侯于楚謂爭楚之無益弗如棄南圖北割據以自實可捐伯而以謀王也師楚之知抵楚之閒嫁宛周之惡于秦楚而實以吞周所封建之天下拊山馮河以臨周于是而七雄之勢成矣七雄之勢成而晉得其三是晉半得周之天下也王失則伯維之捐伯不居而雄心有在是周之亡不亡于秦楚之爭而亡于晉之委也故鮮虞之師周之所繇亡人不知其以亡周封建之所繇裂人不知其以裂封建而君子知之則已早矣曰晉自是而非晉之晉也敵也狄也有天下者爲之防焉耳無用治矣嗚呼秦

窺周周而外有秦鄭裂中國以楚爲名而爭天下則周外有鄭晉以山東餌楚闕吳而自食河北則周外有晉秦爲秦鄭爲楚晉爲齊燕因之遽以分天下滅宗周而盡傾封建秦倡之晉成之齊猶有侯馬齊其免夫故六國之亡韓魏爲先趙爲慘齊最後亡而殺戮亦淺秦一宇內遽燔于匹夫之手爲萬世笑春秋之所擯爲不足治者天之所重罰故曰聖人之于天道合一者也

以道定天下之刑名實而已矣刑不從名名不從實別爲之意以或出之或入之刑不中道不立自矜明斷而天下去之也若驚故矜明斷者未有不驚天下者也楚圍實未

嘗弑君也故春秋正其名曰楚子麇卒楚公子比實弑其君也故春秋正其名曰楚公子比自晉歸于楚弑其君虔于乾谿齊不以討賊之罪殺商人故春秋正其名曰齊弑其君商人乘疾以討賊之罪殺比故春秋正其名曰楚公子乘疾殺公子比以比之稱公子爲疑則商人之弑君亦稱公子矣以先言歸而後言弑爲疑則比嘗出奔非弑其歸將嫌于在晉之不得弑也正亂臣賊子之刑使速卽辜而無辭名正焉耳授弑父與君者以名使終得名而不怨實殷焉耳故曰徵諸庶民質諸鬼神而無疑實以庶民之聞見爲徵名以鬼神之怨恫爲鑒春秋成而亂臣賊子懼

懼此焉也邪說興疑辭濫暴行有託以免巧者避之愚者
嬰之故其詩曰有兔爰爰雉罹于羅王道之壞名實先亂
詩降而風乃作春秋以名準實以刑準名實刑準名實而
免不得逸雉不徒陷春秋所以撥詩之亂而反之正也聖
人沒大義隱傳者矜明強斷出賊而入良則春秋反爲亂
首君子知趙盾楚比許止之實弑而鄭髡頑楚麋齊陽生
之實卒雖有淫詞勿聽之矣

美之大有傳人惡之尤有罪主不立夫罪主者其非惡之
尤也不足有傳人者非其美之大也雷震夷伯之廟而目
言夷伯以爲其獨以當天之怒矣石碯殺州吁離廩殺無

知而慨之以人石碯討賊之力微雖麋乘亂而無必志不
足以當討賊之實也二百四十二年之間一與一相當取
推刃弑逆之賊無倚于人而伸其獨憤者公子棄疾而已
春秋書楚公子棄疾殺公子比大詞也大之乎石碯之與
離原而棄疾傳也聖人沒大義隱淫詞以亂覆大惡搶大
美知義者之所弗取弗取之者不足取矣謂棄疾脅比以
立而又忌殺之則是比弱而棄疾強比拙而棄疾狡比猶
賢而棄疾固惡也詘弱以伸強勢人之術春秋之不爲勢
人審矣拙者爲狡者之圖而護狡者之譖以弑君之罪歸
拙者愚人之斷春秋之不爲愚人審矣抑弗獲已而曰比

賢而春秋責備之邪夫責之備愛之深也責之以大粹而
摘其小疵全之也取他人覆載不容之惡推與之以卽汚
瀦之刑人何利有君子之愛一陷小疵而卽嬰無上之辟
哉嚴其所惡獎其所愛君子之情不回而天下順焉苟其
所愛貸其所惡雖得天下不能一朝居甚矣夫淫詞之以
害治拂情而賊道如此其烈也春秋傳棄疾之人以甚美
其討賊之獨力二百四十二年之僅見立臣子之鵠以伸
天討大義昭無容掩也

春秋之始不授伯授伯者以拒楚也授伯以拒楚楚雖善
而不納遞乎長岸之戰而內楚者以拒吳也故君子之道

無遠也無莫也此思澤業時以盈虛行其庭不
人雖不可與有無見者矣是人及吳戰于長岸號吳人
而殊之內楚外吳之旨明矣外內者無定形以內視之
外以外視之而內猶門庭之與室也庭視室而外視諸門
而內矣楚始僭矣是于周外而有楚也故從乎周而外楚
中統邊之詞也楚受貢于甯毋爭晉而不敢爭周終乎伯
而忌王衣裳禮物肖中國而從于會盟吳乃以斷髮文身
之質蔑禮尋兵而亟乘楚禍則從乎吳之外而內楚近統
遠之詞也近遠者非地與族之謂也均是人也言不可得
而通服飾器用不可得而名嗜好怨惡不可得而知斯遠

乎人矣遠乎人之必外故近乎人之必納是以弗獲已而納楚近乎道者近乎人遠乎道者遠乎人道不可得維其人人不可得則又維其人道之近授伯則以人存道而道可屈內楚則以道存人而人可汎故曰行其庭不見其人廣大其心以存人道而無適人君子之于人道至切矣夫子歎吾猶及史之闕文而今亡文亡闕者曲以成其說也闕而曲成之則抑不必闕而亦曲成之罪人之曲辯黨惡者之諛詞簡牘未刪或樂其新以取之而是非撓于是聖人作春秋據名實定誅賞黜曲以伸直實有者不故出實無者不故入聖人無意因天下而不私其書曰許世子

止弑其君置赫然舉覆載不容之罪加諸人子實所本有
不得而出焉定矣傳春秋者猶曲爲之說縱止于大慙而
陷春秋以深文之過俗儒淫大義隱卮言日繁世教之陵
夷久矣且夫出人罪而使之輕則輕者無處矣入人罪而
使之重則重者無處矣不嘗藥而言弑何以處夫楚商臣
蔡般之躬爲梟獍者也納商臣般于不嘗藥以毀死之等
而商臣般可自託于孝子之列矣且夫不嘗藥之不可言
弑猶其不可言孝也周衰禮廢二百四十二年以卒葬見
者百有餘君其子之能嘗藥者吾不知其僅幾也藥之殺
人也或嘗而得或不可嘗而得以尤毒之藥攻疾雖無疾

者嘗之而眩百不一也已寒而清之已暑而溫之表疾而裏之裏疾而表之雖殺人也速要皆不可嘗而得者也故嘗藥者孝子之末文也僅以一嘗終臣子之文而子道畢僅以一不嘗未修己末之文而弑名定是率天下以爲僞而蔑其固有之良矣故曲爲之說者不足以賊道則聖人何歎焉有所無無其所有司曲謹縱大惡還末文損天懿聖人之歎歎此焉耳歐陽氏之辯得聖人之旨必伸傳而抑之胡氏之保殘事已固矣夫

葬者人子之事也君弑而賊不討以是爲無子矣故不書葬有賊臣以當罪而子猶與于惡也雖然與于惡而惡亦

滅矣罪定于難刃之賊臣特以不葬誅其子使視夫捐其
親于溝壑者當不孝之罰以情議法等殺差也若夫爲世
子者既弑其君親大愆之刑致一而已則不復以不葬再
誅其子已從乎重舍其輕也已從乎重復從乎輕是猶可
求之于爲子之道而大惡逸故蔡景許悼之書葬不復以
子處其子也臣弑君賊不討以不葬誅其子子弑父賊不
討不以不葬誅其臣與其餘子何也葬非臣事也喪有主
而弑父者爲喪主亦非餘子事也身爲儲君分尊勢偪威
行于中外恬然就宮中爲逆而代之立中材以下爲之臣
與其餘子固不能旦莫討也君子矜焉而有待不遽誅也

且不葬之罰誅世子者也臣與餘子終不能討亦不于葬誅之法之所麗貴賤之差辨矣知此則蔡景許悼之葬其義也許止之爲梟獍又何辨焉曲說者求之于葬不得則又求之于日無所不爲許止解意者其樂爲梟獍之私暱乎

諸侯之世子必名故當喪有故而亦名子般之以名卒猶子同之名也王世子不名會于首止君在而不名則君沒當喪不名審矣以是知書王猛者非以猛繫王也猶之乎鄭忽齊小白莒去疾之以國繫名也王室不可以言周則曰王猛猶云王國之猛云耳王國之猛猶之乎王札子也

繫猛以王國猛可以有王國乎猛可以有王國則猛可以有王國之即得稱天王不名矣猛不可以有王國爲猛治也故從乎王札子之例以名猛而紂之猛可以繫之王國爲王室治也故從乎鄭忽齊小白莒棄疾之例以國繫猛而誅于朝猛可以繫之王國胡爲其不可以有王國邪長幼之大倫天下之公議也父子之仁兄弟之恩當其事者自喻之義也景王之意廢長立少秩大倫者所不與猛所不得而奪也長幼之大倫天下之公義人子不可得而奉乎曰奚可哉故伯夷者非夫高人絕世不可徧賁天下人子之行而荀弗伯夷尙得以爲子者也孔子曰道二仁與不仁而

已孟子曰欲知舜與瞽之分無他利與善之閒也苟弗伯夷不卽均乎盜瞽者小德之或然也苟弗伯夷卽均乎盜瞽者君臣父子兄弟之閒也子朝以幼奪長乃先王則有其志矣先王之志不行猛立而朝爭則罪專朝而猛免先王之志或奉之朝有挾而猛爭則猛與朝分罪春秋書王室亂王室之人皆亂人非獨朝亂也非獨朝亂而猛先之朝乃應之是故敬王未立以前春秋不曰子朝之惡而以王猛居皇繫諸王室亂之下明乎亂王室者猛也父子兄弟稱兵相向曲直爲輕先後爲重苟先之矣雖直曲也苟欲弗先雖欲不盡責人以伯夷而不能也故君子之責人

不逮求其如舜而責人之子也則必之以大舜伯夷秦伯而不爲苛故曰替暇底豫而天下之爲父子者定定者必至之準也朝有尊長之心而猛先之以事故猛未卒朝不適罪朝既有爭猛之事而敬王立以靖亂故猛已卒朝惡不戢敬王討之以有名然後曰尹氏立朝之惡而正敬王居尊之號敬王所奉以討朝者爭猛之無罪也朝篡而成乎賊也王猛所挾以首亂者景王之過也挾父過者不孝之尤則不可以誅人之不弟也追景王之失以治子朝于他日義著于天下君道也名王猛以紂諸世子之外揜子朝之惡而未發義喻于當人之心子道也當人之義動諸

心悅諸慮不可以名爭不可以天下之公論爲所挾故曰
義內

父之志不可奪無之而奪焉者乎曰權衡者非適有也物
無適權衡而乃以用夫權衡故心卽爲權衡而非有權衡
焉聽心之用也彼心之所輕重若將爲之權衡矣而我適
從之是吾無義也或適違之則父子兄弟之際不得以有
義矣審彼輕重之所向者吾心之用也故禮莫大于別嫌
仁莫大于全愛無嫌而愛可全君子之以精義也是故景
王之志志立于朝王猛奪之而爲亂首勾之爭朝猶猛也
猛以奪父之志受誅而勾無嫌審此者可以全愛矣景王

之志欲立朝也。猛長于句誦于長而朝不得立者，惟猛當
景王之存，猛固存，句固無壓朝不立之勢。則景王之所甚
惡而忌焉者，猛之立，非句之立也。子朝不當立而立，景王
之邪志猶之可奪矣。猛爲景王子，景王惡其立而忌之父
之惡子，可行于子，不可以邪志言也。猛見惡忌于君父而
欲挾己之是，奪父之志，犯其所甚忌，居厚實于己，以彰先
君之過，猛乃以受大惡而不可辭。敬王之立，非先君之所
忌矣。先君無惡其立之心，則矯先君之邪志以挽而之善
敬王，可以無大恟于鬼而伸大義，以靖社稷，愛未損也。使
敬王讓篡兄之亂人，迎先君之邪志，與于邪者也。先君無

忌我之心疑焉而不敢立成先君之惡者也故伯夷逃叔齊不可立而申子可立于朝篡王猛不可討而敬王可討孤竹君無忌于申子景王不預惡夫敬王無忌無惡不得以億君父之或忌或惡而自疏所以曲全乎愛也景王緣朝而忌猛弗獲已而甯立勾于此而自信以不疑非奪父志也其庶幾乎幹蠱者與春秋書天王居于狄泉大義以無嫌而定全父子之仁也

傳曰春秋因魯史之舊文有可損而不能益允矣夫不能益則傳聞所聞所見辭無可異而或益也夫子作春秋定大法無所避就而有所避就者不以其知之以而侵史官

之職也故傳聞所聞之不益非懼其不確也所見確矣而不益更有其司聖人不以意侵之也不以意行故曰無意不以我侵人故曰無我善言聖人者卽于此而得之矣故王室之亂自言其亂猛朝敬王之備記其始末皆魯史之舊也公孫于齊遷之晉其次其居其在紀之已詳亦魯史之舊也昔者王子猷之亂志齊之伐衛而盡隱子猷之實叔帶之亂志天王之居鄭而不著復入之事或曰猷之亂齊平之帶之亂晉平之魯未有事而史不詳乃猛朝之亂魯亦未有事昭公出意如不自保夫豈暇爲王室憂而舊史猶詳之春秋不損何也當時晉不能伯無能奉敬王以

靖亂而天下之人心戚矣昭公出季氏不敢立君曰錮公
于外而以逆公爲名國人未忍忘也國人未忘而公卒不
返魯國之人心戚矣心之戚故志之詳襄在王室失職在
伯罪在疆臣過在昏主崇貨忘義在齊晉之執政史臣無
所取裁乃孤伸其意以立文聖人之于春秋也下失道則
挽權于上上失道則取衷于下魯之史臣內戚其君上戚
天子志之弗諼言之不忍略聖人以是爲不可損也卽人
心立大法專用民志以存天彝以爲有變例而特書啓王
通元經之妄作誣矣哉

事之未敗則人競其說事之已敗則敗者徒咎夫人之欲

避咎則無如其避事之得矣避之于事先便以歸咎于任者嗚呼何進景延廣之以其身爲咎府而田豐李綱之挾敗以爲名復誰與之爲搆澠哉事未敗而兩說疑否彼而可此者未嘗有固可否也人之所可從而否之其否之也力而自可也不力非不力也無固可者必將居于不力之地假人以勝而可便咎其敗也天下之禍莫大乎議事者有幸敗之心先居于競之無力授人使敗而已避之匪然天下亦安得亡國之與敗家哉及事之敗咎不我尸咎既有歸然後以無徵而持其固可立爲定論垂于後世說淫辭堅而追論者信之如昭公棄晉主齊之說放于數千年

而莫辨其誣乃不計昭公方出之日孰爲謀而以主晉爲固可邪昭公之未奔也七覲于晉劣得成禮一而已矣晉之于公何如也故意如非能逐君也孫宿有晉而後衛亡魯接有齊而後赤弑逮乎叔舍見執公自往請次且河上託疾以退不待晉人之辭而公已憤然自絕于晉矣然後陽州之役何忌驪戾敢于比賊以攻君晉人曰君不使一介辱在寡人將誰欺邪晉之無志于伯者晉卿之下比以交蔑其君也路人知之矣士鞅黷貨不廉于梁邱而權尤重志尤慝晉不可恃弗獲已而改圖故當陽州野井之際昭公所可與爲主者亦惟齊而已矣晉失伯而齊欲得之

陳氏有下比之私而猶不敢逞樂邱之貪賄行于莫而猶
忌于晝是齊有三可恃而晉無一也齊不足主而奚況于
晉哉從乎主齊而不成則晉挾以咎齊而爲之說者挾以
咎公之失主鄭令主晉而不成齊且挾以咎晉爲之說者
抑曰野井之暗鄆陵之盟齊勤魯如斯而昭公舍齊以自
陷于晉也其又何辭惟先以主齊而主晉之說帥故實敗
之餘樂擒任事者之短以捷取前知之名而立乎成敗之
外以塞任事之口而寒其心國奚其不亡而家奚其不敗
乎公奔未幾齊唁已先聞成不克鄆陵繼會公自無反國
之才于齊何尤焉探本者末論之平也平情者聽焚之既

也設其不然要以觀其終者盡變之道也以彼參此早計而取必其可否者懲利口之法也以是衡量乎百世略成敗而持公論事雖敗而咎不偏歸君國長民之要術也而佞人遠矣夫佞人者豈無以挾熒人哉幸人之敗以自獎無固可而有固否君子之所甚惡惡此焉也

春秋之與晉不如其與齊齊失伯而猶列之侯晉未失伯而□□□春秋之□楚不如其□吳楚進而以中國之治治之吳終不以中國之治治也楚額度之弑爲誅其賊鄢陵君傷目言楚子逆之乎中國之君臣矣吳過與光死于戰而不言滅不賊其兵死也吳弑其君僚不著其賊不

卷之六

而廢大倫商臣比所以服刑于司寇所惡于無君臣父子者□□□也□□□□斷髮文身□□□君臣之義父子之恩復何望焉號舉吳以視司寇之所不治也別夷于夏而王事與別人于禽而天道正以王治晉以天治吳聖人無異用人事有異受故曰理一而分殊

例曰□□□□志吳楚之兵爭則內楚以外吳不從平相攻之例矣吳越之相伐相入詞平而無所內無所內而猶志之春秋之例于是而變也天下之勢必有所在昭定之際晉無伯心齊欲爭伯而不成楚奔命于吳而不給勢之所趨合離之所競西不在晉東不在齊南不在楚吳

越于是乎受勢之所歸以司天下之輕重故其相攻也天下之所視也天下視之而天下變天下變則例變□□□之攻所以甚天下之變也天下變則例變例變則道亦可變與曰道有隨例而變者君子之所以用時也有不隨例而變者君子之所以不爲時用也昔者春秋嘗不授齊以伯矣已而授之授之齊而又授之晉繼而惟恐晉之不足以伯矣此夫例因天下道因例用用時以治時者也其于楚也嘗號舉之矣已而爲存其君已而引之以內惟恐其不得志于吳矣此夫以例從天下屈道從例不獲已于時而救時者也至于吳而無望焉矣無望于吳亦不可改而

望越無望于越終弗容復望于吳吳越之事輕死崇殺獎
詐尚力自戰而不爲天下動苟勝而不爲之名棄□□而
賤□□□□□□□□□□□□□□故君子可用時
而不爲時用楚可用者也吳越必不可用者也必不可用
而用之則爲之用而已矣故吳越相攻之詞均而不以內
楚之道內吳也人禽生死之際道之尤嚴舍此而君子無
道奚容變哉然而天下視之矣吳勝則走吳魯衛走之而
晉且走之也越勝則又走越魯衛走之而齊且走之也迨
二國者之已滅其遺知餘習猶以染戰國之天下趙武靈
秦莊襄始皇之所尚皆吳越以爲師則天下之大變始開

于吳越君子不能自愛其例而爲天下錄變乃不容不自
愛其道以治天下之變故春秋有三變王變而伯伯變而
夷當其伯不能爲王存也而存伯之詞恕當其夷不能爲
伯存也而存夷之詞危其詞恕者裕道以望伯其詞危者
守道以望夷每降而君子之心益傷見乎辭矣

春秋家說卷三

終

春秋家說卷三中終

春秋家說卷三下

船山遺書十四

衡陽王夫之譏

定公

六月癸亥公之喪至自乾侯戊辰公卽位割戊辰之前以君昭公正戊辰之始以君定公春秋之義例魯人之情意如之有憚而託乎禮三者合也意如無憚則魯人不得以暢其情魯無其情則春秋不得以存其義故知禮者先王束不肖于義而盡人之情也凡民之所暢君子之所存不肖者弗敢異焉然則夫禮者雖不肖之情莫之或違也不然孰迫之憚而必遵此哉祭仲之心乎嫡也叔武之未忍

于君兄也甯殖之死而不忘悔也其情亦可反之正矣而
國安于無禮無以約之則不足以生其憚心不肖者冥行
自是而國人習焉于是而聖人莫能爲之例鄭儀衛剽與
出奔者而竝稱君衛叔武非喪而稱子生死存亡一彼一
此無義之例聖人弗能正也故凡民之所習不肖者之所
憚君子之所正相須而後成乎典禮義不誦矣公子宋逆
喪于乾侯其猶授受也五日而殯殯而踐阼其猶顧命也
季氏不純乎賊矣故治賊者嚴籥賊者辯籥不辯治不得
嚴驅季氏以等于祭仲元咺孫林父之刑彼何憚而不早
爲其已甚者與文虧則求之質質虧則求之文文質兩無

可原而後刑之不貴魯人有情質未澆也意如有憚文未
害也子曰我愛其禮禮在而成之不忍誦也文以留情質
亡于一時而存于後世聖人猶且愛之豈徒愛其文哉愛
其欲暢之情有憚之志也無庸深求之矣

觀諸瘵者非固瘵也適有所因炁氣乘之拙工爲之診曰
此他日之必瘵者也遽而攻之攻于所已病而助病力之
未逮攻于所未病而導病以入五攻五入病周乎藏于是
乎而瘵成拙工固曰吾信他日之必瘵豈妄也哉忌其爲
毒而攻之攻而必得其不勝故忌瘵者恆得瘵忌敵者恆
得敵忌亡者恆得亡吳之通晉而叛楚因爲晉而窺楚未

能如楚何也。晉之請已勤，姑試之。州來浮動之吳也，奚其必楚療哉？楚于是而殫力以事吳，抵乎闔廬之七年，兵加于吳者七，吳固不勤于伐楚。楚自勤于伐吳，吳一伐楚而君死，原野楚七伐吳而敗者六，長岸不勝，雞父燔卒于舒鳩氏之誘，未浹兩歲而入郢之禍烈。夫破楚者，誠吳也。雖然，吳奚有破楚之志哉？一伐再伐，殫于七伐，楚未嘗不勝也。是楚召吳，驕吳，堅吳以質吳，而一往不返，不可禦矣。吳其如楚何哉？憂之如無憂，謀之如無謀，爭之以不爭，防之以無所防。曹丕曰：「權于江，錮亮于山，誠哉其審于敵也。」而吳蜀不能爲魏。

吳楚昭王之反也，吳怨諸矣，置吳以

授越而不夾越以攻吳故越爲楚滅吳而終蘊于越國嬰
齊建之不逮此況囊瓦之區區者乎嗚呼夷狄非吾類也
師一舉而地一喪再舉而地再喪五六舉而天下隨之無
曹丕楚昭之知不察以死者幾何邪

有拾仁無拾義有拾地無拾人仁人心也拾而固保之則
仁歸之因心之不遠也義制也非我制之天下之制無有
于己而終不制也地從人者也偶從之因而保之或欲與
爭而抑難矣人不相從者也彼失之不必此之得之拾而
得之如搏沙之不能須臾也晉定公之爲君范鞅荀寅之
爲政召陵之大義召陵之大眾介然拾而用之春秋紀諸

侯大會于召陵而終之曰侵楚猶以一綸之絲束于株之條枚而寘諸獨輪之上也侵楚者拾義者也楚有可侵之義而晉拾之晉固無侵楚之義于懷而抑不能灼然持之以侵楚也蔡曰楚可侵諸侯曰楚可侵弗已而侵之楚自詒侵而晉何有焉十八國之諸侯集而晉主之者拾人也楚遺陳蔡鄭許頓胡于四達之衢而莫之收晉乃淡然相遭而拾之齊魯宋衛曹莒滕薛杞邾乍驚其拾之眾弗已而從之乃諸國者固無依晉之心晉亦固無收諸國之志也合而會會已而離不謀其來不保其往旋拾之而旋失之晉亦不戚戚焉嗚呼使義而可拾也則商紂之世人得

爲天子也使人而可拾也則陳涉之戍卒翟讓李密之飢民足以定天下于俄頃矣且夫拾義拾人者之奚但無成哉拾義而義不保之乃以恤廢于義而益保利拾人而人不保之天下益以知其無能爲主而離矣故荀寅之食至召陵而崩晉之失伯至召陵而不可救也春秋之書此猶以一綸之絲束千株之條枚實之獨輪之上傳曰化工賦像情不得遷徵矣

無小國則大國孤立大國孤立則相逼而互以相亡故君子治三代之衰尤爲小國念也小國之羸則旣不足以自存矣于是因人以存又不必因者之可怕也怙非其怙猶

免于亡君子之所弗責怙似可與怙怙之以亡君子之所
弗嘉夫鹵莽而毆入于人無庸延旦夕以有冀小國不獲
已之謀也毆使之動而以亡無庸置之而猶存大國不獲
已而亦以庸小也一動焉一招焉一毆焉一若有怙而果
不可怙昔之尙爲冠帶之倫者今陸沈而受□□□□
猶且曰慕義義其以亡人之國者乎頓胡沈許之戴楚也
小國之逆伯者之恥也乃其以戴楚故而不趣亡于楚則
猶守先王之侯服崇明祀以待王者之興也嗚呼蔡一動
誓一招動之弗動招之不前而疾爲沈矣動之動招之至
而終爲頓胡許矣沈亡之後二歲而許亡又八歲而頓亡

又聞歲而胡亡胡亡之踰年而蔡以聞于楚夫此諸小國者從未嘗一執玉于晉廷者也晉無此諸國而諸國存諸國一有晉而諸國速滅然則卽不執玉于晉之廷而何莫非三代之提封邪四國毆亡而陳蔡不立陳蔡不立而中原解中原解而七國孤七國孤而必并于一周之所以亡三代之所以訖七國之所以魚爛而終此禍之不爽于遠者也陳蔡賴胡許一受命于晉而齊魯鄭衛之去晉也如驚得小而喪大得名而喪實此禍之不爽于近者也周公曰君子德不及焉不享其貢保人以自庸也晉定之爲君士鞅荀寅之爲政而大會天下于召陵君子之所深爲天

下念也

俘人之君甚矣甚其無忌而爲之也襄昭以前滅人之國者不及其君猶有忌也楚之以蔡獻舞□之亂□也晉之以潞嬰兒伯之治□也□之亂□固無所忌伯之治□固可弗忌也均爲分土之諸侯俘其君將臣僕之以加人者人得而加之當其淫以逞而不知忌夫豈有人之心哉蔡以之加于沈鄭以之加于許宋以之加于曹魯以之加于邾國失其所以爲國君失其所以爲君不相毆以亡而不得矣且夫勢果有定乎哉俄頃之勢而乘之以爲名天下之至賤而安忍者莫是過也沈一不會于召陵

而疾被俘殺召陵以前新城以後蔡之宜得俘殺者百年
而以責沈于一旦曰吾有名而固有義也所爲至賤而安
忍者也故滅人之國貪也俘殺人之君忍也貪者吾將懲
之以仁可使勿貪忍者吾將懲之以義不可使無忍苟忍
而襲義以爲名卽有名矣有名而義不得施其懲故君子
甚惡夫安忍而蹈乎至賤無從而救之也孟子曰今惡死
亡而樂不仁是猶惡醉而強酒俘人之君者當之

庚辰吳入楚

當從公穀

曰言吳以免蔡也柏舉之戰蔡爲之郢

之入非蔡爲之也不許吳之入楚故曰言吳免蔡以專乎
吳不許吳之入楚非不許蔡之入楚也吳入楚而楚他日

報怨于蔡楚非所報而蔡徒得怨蔡徒得怨則使蔡與于
入楚之役蔡且免于報矣非我類者喜怒不可以理求苟
可以彊而彊非我罪苟可以彊而終以彊懼之彼且懼焉
然則蔡猛于戰楚而憚于入楚吳專其咎而蔡免蔡之不
足以自免始于此矣楚之彊無有大折之者大折之以入
郢之血蔡又憚而不與吳終其事君子之所大閔故詞免
而實不免惜乎楚之大血授之吳而成其惡斬之蔡而不
竟其功也蓋蔡之憚楚久矣志憚而實憚之實憚而名亦
憚之蔡固以宗周視楚戰之者不勝其一旦之忿焉耳忿
已事裂而慝然不居天下之不勇于義者非義之不能爲

勇也一旦之忿不惜其素所宗周視者遽引封豕長蛇以相攻蔡固不義苟襲義而義亦倭也忿實也義名也非所據而據非所困而困楚得以爭曲直于吳而蔡爲怨府故無實而奄其名神守先喪而敗隨之蔡惡敢毅然以入楚不敢入楚而又惡得免于敗亡邪故蔡之惡然不居取怨之招也

屬人爲與而委怨于人未有不失人者也故妬之二曰包有魚不利賓象曰義不及賓也義不及賓而委之賓是委義也賓本無魚而委之魚魚在賓矣魚不及賓而我及之賓不固獲魚而魚不固怨賓是委賓以魚而委義于賓矣

義之所不及者利之所違身任天下者雖欲不慷慨自任而不能義吾義也利吾利也怨吾怨也未見怨之可委者也晉失諸侯鄭首叛之然則治鄭者舍晉其誰任哉晉任之然後與諸侯圖之晉不忌鄭怨而以爲功諸侯不邀鄭功而安于無怨伯者之以屬諸侯糾天下固非此而不得晉之不能而委討鄭于魯則何如勿討之爲得乎魯能服鄭則魯不必晉而可以還于諸侯鄭將蠱魯以充晉晉無庸矣魯不能服鄭則魯之不利晉之不利也魯小損其實而晉大喪其名晉無幸矣魯無固爭鄭之心薄伐于鄭而鄭不固怨魯方責鄭之親晉鄭方覲魯之合齊兵加之而

不怨魯意且釋而鄭是聽晉不能必魯之不叛而況鄭乎
魯弗固怨鄭鄭弗固怨魯無故而激人以相怨魯且自喪
其所謂而怨晉之嗾已晉無辭也嗚呼委怨于人者人之
力且窮人之憤且平人之相酬也亦藉手以告無過進不
能爲之圖功退不能爲之任禍故魯一侵鄭再侵齊齊鄭
益急晉以蠱魯而魯長舍晉以束合矣故知委怨于人之
失人義之所違卽利之所窮也晉嘗失鄭矣鄭移禍于宋
晉不使宋當鄭而自任之悼公之所以服鄭也晉嘗失齊
矣齊移禍于魯晉不使魯當齊而自任之平公之所以下
齊也服鄭而宋益親下齊而魯益固悼平之伯伯之微者

也而自任也且然況桓文之盛乎晉委鄭于魯乃以委魯
于鄭諸侯之兵競起而散非固委之人抑未能收之也
觀其表知其裏可以喻天下之心觀其行知其志可以測
君子之權故魯之侵鄭非競鄭也魯之侵齊非競齊也矣
以諗其然也侵者無意之兵也公羊子曰桓者曰侵精者
曰伐精云者壯也桓三者淺也魯無怨于鄭而抑不覬利
以興兵故不壯于競鄭齊臨魯以兵而實覬合于魯魯知
其故而無深怨故不壯于競齊淺用其師以動之不執罪
名不叩國都姑以侵焉可以釋則釋矣是以踰二年而平
齊又踰年而平鄭聊以瓦之會謝晉而終于無競故鄭齊

之師不得信之爲競也弗察其中情而信其表之競爲愚而已矣夫君子將許之乎曰繇君子之許魯以平齊知其許魯以平鄭矣奚以諗其然也十年春魯及齊平夏會于夾谷孔子相諧其甲車三百乘之從受其歸田之謝是以知君子之志也書及齊平無貶詞書及鄭平抑無貶詞是以知君子之許平齊以平鄭也諸侯之從王也受命于天其從伯也受命于天從伯之受命于天何也小役大弱役彊天也彊弱無恆勢從違無恆理昔之彊者而弱昔之從者而違天有革命而人奚得不從哉天命以從伯勢以成乎理也天命以從王理以成乎分也勢不可爲典要分不

可爲推移故春秋諸侯之背王也爲重傷之遲回而不之聽其背伯也可以聽卽聽之無待也分司典要以飭人之紀勢善推移以勸人之功無當于人紀而功可起焉君子胡爲而爲之遲回邪勢在伯則許其從伯伯不給伯則許其自爲功自相平自相伐相與謀其邦交以輯圖其國伐而非以競平而非附于夷雖許之焉可是以君子躬行之而贊其成也

伯之不一諸侯無攸保將自保也自保者立國之本計邦交者人倫之大節並行而弗相奪君子之道不當如是邪伯之不一伯舍之而弗爲之遲回非君子之薄也伯之不一

姑繫之而祇以自傷也齊桓之伯也咸乎當母以適王爲通王貢之名者王貢繇齊而輸也諸侯致貢于伯伯致于王則不純乎王而貢者多矣是猶季氏之盡征而貢于公也齊始之晉因之悼公因之平公增之觀夫子產之爭叔孫豹之請視邾莒則竭侯國之力以供億一伯久矣大夫又從而私索之然則將欲自保而姑繫于伯內虛其國外弗與恃國勢之所必詘故諸侯之奉伯也名小詘而實大詘也南宋諗金之必亡而不能自絕于歲幣金亡而隨之遲回而不舍宋以天下斃焉百里之提封其不足以勝此明矣竭立國之資上不以媚王中不以修備下不以紓

民委之于屏德之壑而意又睽焉是將以國命民膏賈長
厚之名君子之厚也非此之謂也詩云魴魚鱗尾勞民以
奉君也文王以之以文王之事殷者事伯殆乎愚子割肌
以療母之後夫也使伯不以列國爲腴列國不以伯爲漁
伯不以列國爲薪列國不以伯爲斤雖失其道猶將依之
也苟得其道南國之所以戴文王也詩云父母孔邇君子
豈欲人之輕去其父母哉春秋許魯之平齊鄭以背伯惟
其非父母也

記禮者曰禮不下庶人刑不上大夫是斬禮于上而專刑
于下不足以語王道矣彼將見庶人之不足備禮而大夫

有議貴之科也泥于一端概以全節斯惡知政本之與禮
意哉王者之法刑尤詳于貴禮必逮于下大夫以下刑有
不足施王者弗治焉不治而欲弭其亂則修禮以自嚴而
銷天下之萌於詞典知此可以知春秋之議刑矣封建之
天下遞相臣也遞相臣則亦遞相君也天子臣諸侯諸侯
臣大夫大夫臣陪臣相遞以尊而分各定故諸侯專則奪
之大夫竊則誅之曰言其所專所竊以正罪名而致之辟
專兵則目之專地則目之禍施于國背陵其上則目之大
而不降小而不遺春秋之以刑治諸侯大夫者詳矣而惟
陪臣則不然陽虎之亂也覲殺其主挾其君公據邑反兵

蹀血于都市而播惡于鄰國藉大夫而有此樂盈華定之
誅所必嚴矣而春秋甚略之略之者非謂其罪爲不當刑
也以其人爲不足治也人不足治則罪亦不足刑故刑有
詳于大夫降于士而宥于庶人王者乃以統貴治賤而不
與天下爭生死也刑所不詳治所不屑有以治之而不恃
治乎法王者之治太平也固然而猝逢其亂起于愚賤王
者將聽之而弗治乎曰可弗治者固弗治也所必治者不
可弗治者也故陽虎之欲殺其主挾其君公據邑反兵結
彊鄰蹀血都市胥弗治也其竊寶玉大弓固不終竊也然
而必治也所弗治者何王者端本以議刑惡肇于季氏終

濫于陪臣大夫陪臣統賤也而賤而不相爲故治其本貴
其末可矣故刑有不下逮于士而無不上于大夫之說也
議貴者非此之謂也所必治者何王者之齊天下置刑而
尚禮齊者貴賤一矣寶玉大司者先王之以禮鎮元侯而
顯之于器與名惟器與名王者之以一天下而觀之以禮
也雖暫竊之必因誅之出乎禮入乎刑爲弗赦矣故刑之
所至禮必至焉禮修乎上而必達乎下庶人之不能備物
非其不能備禮也以刑治者治人者也以禮治者自治者
也大夫之漸貴諸侯之進尊非其親之可親則其賢之可
賢親者弗率賢者弗能自獎貴而弗治獨奈何忍以責之

卑賤故王者治人不專于賤略于貴也若夫以禮下達緣
禮而議賤者之刑則王者不但治卑賤而先以自治矣故
書盜竊寶玉大司又書得寶玉大司自治之詞也自治而
乃以治人出乎典禮而後卽乎典刑王者之治卑賤惟自
治焉耳自治而治人略矣後世之議刑者不然多求卑賤
者于法而寬之于禮曰禮者不下庶人者也刑者大夫以
下之所詳也東溟鉗網一以不道無將之辟摘愚賤之冥
趨而禁之至于國家之大典人道之大倫者以曉然播告
于天下逮其顯相背犯則又以過誤而寬之此無他自弛
于禮弗能修明而後恃刑以治天下刑禮上下之閒顛倒

混施而上慢以下賊也故刑曰繫禮曰圯人而致之禽生而致之死可勝悼哉

宋兼殷周之道以立國用殷者從世守也用周者從侯度也故微子之詩曰亦白其馬亦云者亦彼亦此之謂與殷之盛也則有若伊尹仲虺甘盤巫咸傳說以起而在位其亡也則猶有祖己膠鬲商容以立乎其廷皆非同姓之胄也是故終殷之代有取亡之主而無取奪之臣周先同姓而世卿啓崇世卿而君無固權魯晉齊邈周之侯度以終始者也夫不保其無取亡之主無爾無相奪之臣卽不保無倡亂之繇無爾無怙權以移君之事奚爲其然也天爵

地卑而其位定乾坤毀則無以見易立人之道滅矣宋用周也是故戴宣武穆之族世乎位而不替亦用殷也是故迭相執政而權猶司之于君春秋所書魚石之于彭城華向之于南里辰佗彊大心之于蕭不出則不能叛不叛則不能專蓋宋有叛臣而無怙權自安之臣所繇與晉魯齊異者久矣不能保臣之無叛猶夫不能保主之無取亡也有亡主而無亡之之臣是故文王之聖而紂猶不滅有叛臣而無怙權自安之臣是故據彭城連彊楚分南里據國都據大邑聚不逞而卒如螢死之光不能久也惟夫雖權自安之臣不必叛也不必叛而無可爲討逐之名天下之

所不誅不必叛而國如其國君寄生其上而一聽其生死
故乾之極曰亢龍有悔坤之初曰履霜堅冰至君无位而
臣固其居乾坤之所以毀也無位而毀不必有取亡之主
而亦亡冰馴至而堅陰不勞而坐困其陽矣兼殷以爲道
故終春秋之世君恆親將而兵柄一兵柄一是以不叛而
必不敢制其君乃抑兼周以爲道是故不登立談之相不
容羈野之臣而國猶可守故三王之道相終始者也相
參伍者也故曰亢則害承乃制不亢不承而害不深制不
逆春秋詳宋之叛臣以爲猶可得而治之也

書不盡言言不盡意何謂也謂夫一書而羣言該一言而

羣意攝無庸縷盡者也該羣言而不遺攝羣意而不罔其
惟知務者乎君子知務以通詞不知詞以通務故以例言
春秋者恍盛夏之涼雨而謂之凜秋者與春秋稱大夫而
里克殊以里克之名大夫同諸洩冶之名大夫未有謂其
可者也稱世子而商臣般止殊以商臣般止之名世子同
諸陳款鄭華之名世子未有謂其可者也故世子之稱惟
商臣般止殊而蒯瞶不與蒯瞶之名世子常也無殊乎陳
款鄭華之詞也常斯正正斯順故子曰必也正名乎春秋
書衛世子蒯瞶正名效也靈公存而爲世子是靈公之猶
有子矣靈公沒而猶稱世子是蒯瞶以終爲靈公之子

而特奪輒之不使有父也夫蒯瞶之不肖史冊有餘惡矣而其不失爲世子者則在出奔之舉也謂蒯瞶之弑母者戲陽速之辭也速之辭固二五優施寺人柳之辭也先乎世子而公叔北宮趙氏逐矣後乎世子而公孟逐矣巨室去廷爲之空批根椽本以冀其仆者世子也何患乎無戲陽速之爲江充乎世子將欲無去邪爲申生矣申生死而不去君子曰共而不可以爲孝然則以申生之孝而猶不許以孝者惟不去耳蒯瞶去而父子之恩猶未賊焉蒯瞶行順而申生心順均以世子稱未大失乎世子之道也道不失位不可奪位不可奪名不可已匪直輒也公子郢亦

胡得而攘之是以知謂郢爲當立者不足與于春秋之旨也無已靈公卒輒惡逞蒯瞶其可以已乎可已而不已而後父子之倫夷矣雖然蒯瞶之于輒其猶責善之過也責善于梟獍之子洵不知而曰不仁則已酷矣不知以責梟獍之子奪之不使爲輒之父而蒯瞶分惡非不仁以逃嬖邪之禍予之爲靈公之子而輒惡無所分子曰名不正則言不順兩書衛世子而言順矣引商臣般止之例以詞誣意言惡得而順事惡得而成故曰知務以詞通貴成事也天下之方動尤知者之所持矣夫惟有爲而應者介于動而不容已于起者而足以自靜而端居之與振掉皆無容

心此君子以之養德豪傑以之養力豈徒不介其會而爲之淫乎抑將樂其間而以自旌矣晉之不怕鄭始叛之齊乘鄭以收魯衛魯東據齊西向衛居衝而聽之其無與聽而因以靜者惟宋焉耳世說豫徐之交心淫氣憤師師躍蹶而無止勢宋無事焉宋親晉也抑非斬以親晉也國大而得晉久諸侯之所不能動也怯諸侯之所不能動而宋亦樂以自靜乃夫介天下之動而能自靜者一動之制而弗動矣再動之三動之不失其制者或寡也然介天下之動其易與之淫而不制者惟乍一動之爲難持耳一動之而持之也不失則夫再動之三動之亦猶是焉耳矣是故

能以持始而以持終者之難亦惟是持終于始之難而無
難于終然而庸人之失恆難其所無難已持之而終不禁
于一動惟然故其動也未有不咎者也宋接鄭衛之壤其
夙與鄭怨深矣宋恆挾晉以加鄭鄭不輯于晉而恆洩之
宋是鄭之背晉以東合齊北合衛宋之所宜大戒也會鹹
以後七年矣宋自持而鄭無如何之也夫鄭之背晉以逃
役也衛之合鄭以緩迫也宋可以知其無能大倖而聽之
矣聽之而養德王者之修也聽之而養力伯者之謀也聽
之而卽未有養焉彼惡知吾之不重有所養于中也范中
行亂齊衛庇亂以亢晉夫豈果足以殘晉而散天下之交

乎宋乃遽起而伐晉始制之于諸方瓦解之日終淫于小
醜挑達之際鄭于是而知宋之無以自養也知不自持勇
不自制始于不可測終于不足畏困之上曰動悔有悔殆
是謂與未踰年而罕達之師加于宋矣動而悔也宋之所
以召鄭侮也動悔而吉也既惡于鄭而宋終違齊衛以自
立也雖然困之吉亦吉之困矣欲以持天下之動違有悔
而始悔也不已晚乎

咎不與禍期禍必乘焉故君子不畏禍而不迎咎不迎咎
者不求禍也豈徒禍哉咎之所生非盡期于咎也卞急者
禍至而弗假愚鈍者以從容之謀或方在禍而若有可乘

以利用而釋害斯二者抑弗獲已而與咎逢矣從容弗假而氣易張是故鄭衛背晉而晉不容已于遽求焉然而咎在晉矣咎者何也莫能爲主而亟責之也方在禍而有釋害之機則捷乘之以制人是故晉方迫衛于淇濮之間范中行一旦以朝歌而東附衛宜可以緩晉逼而操晉命以自安也然而咎在衛矣咎者何也獎叛人而干宗國也夫晉知迫衛于淇濮之間而孰知捷以苟范授之衛衛卽撓我于淇濮也乃衛知挾苟范之內潰因晉人而以難晉又孰知卽以蒯瞶授之晉因衛人而以大義臨衛也晉逼衛于邯鄲而釁卽生于邯鄲衛脅晉以內難而卽以內難脅

于晉晉不能多得之淇澳而所喪者多衛乘晉之叛臣而
晉保衛之生父故夫以咎報咎者禍報其禍禍不必意中
也晉之逼衛固不測苟范之且爲衛用衛之乘晉又惡知
蒯瞶之且爲晉用哉然而君子知之矣知者何也知咎之
不期禍而禍應若響也咎之相報禍之相沿每加無已而
後受者烈矣禍烈而咎深矣故春秋于衛晉之爭詳蒯瞶
而沒苟范授晉以討衛之實矣

哀公

楚之圍蔡楚復振也楚復振而春秋以伯者之詞許之挈
隨許之君仲楚之長不戒楚之復振也楚之振春秋之所

戒舊矣至是而天下之戒不繫于楚君子弗戒焉君子與時消息者也故戒楚者殊楚于中國也殊楚者以中國之伯殊之也伯不足以殊楚而猶繫之望則君子猶懸畱之至是而晉匪直殊楚之不給矣天下之大紀侯之不淫而王大夫之不淫而侯均此者冠帶之國殊此者蠻貊也楚之殊殊以其侯而王爾楚侯而王而不足以王名王而實不王殊以不侯而非卽不侯也晉至是而侯不安于侯大夫且將侯焉大夫之必侯匪直名侯而實亦侯矣大夫而侯則將大夫而王故其終晉之大夫與楚之君侈然而竝王是則天下之大戒舍楚而移之晉且晉不能治楚而楚

能治吳楚卽賢矣治蔡者治吳者也故楚之事可伸而隨
許得長楚以損吳楚有功于諸侯其殆伯者之遺烈與一
時之大戒在吳無窮之大戒在三晉伸楚以戒吳予楚者
所以戒吳也舍楚以戒晉不戒楚者戒晉之深也是故君
子之喜怒有一至之理無一至之人理至而天下之經立
人不至而天下之時順盈虛消息與時偕行隨時之義大
矣此之謂也

楚之治蔡以治吳也或曰楚不能報吳而釋憾于蔡何爲
其能治吳也曰義有大小略有遠近一旦之義礪義也一
旦之謀墮謀也故舉大而不遺小舉小而大遺矣規遠而

不失近規近而遠失矣大義遺遠謀失雖欲成其一旦之志而必墮故礮者必墮者也今欲修一旦之怨不躊躇經宿而謀之果則固曰楚必報之讎而與爲存亡者吳也乃夫吳豈固有撻尸處室之成心不介蔡而必爲之且一破其都熟營之而必再至者乎且使楚奮以一旦計以一旦空國而向吳又將竟如之何邪楚之不能久吳猶吳之不能久楚也吳幸而入郢而吏士習于輕楚楚不能必有入吳之幸而新敗之餘吏士憚吳率習于憚者之餘燼深入于習輕者之穴是捐國以覬萬一之勝也抑吳之入郢越入其都矣吳之有越猶楚之有秦也快秦之嘗救己信爲

親己而弗防則越之害吳益甚矣人可伏也秦之救楚心
忌吳之有楚爾楚亡而秦存之楚命操之秦矣武關通江
漢之險失而抑挾以虎狼之心楚空國以向吳而秦不生
拊背之心無能爲秦保者也楚之大患在通秦吳爲秦驅
者爾吳不能以初起之勢越江淮而更難楚其于秦倍蓰
之勢也吳持之不得人秦拊之不得歸蔡乃收江汝之小
國梗西道以乘其敝君必死士必燬國必覆雖欲如入郢
之難更得救以復全不可冀已國再破宗廟再夷鬻熊氏
之國餒而而況平王之宰木乎故楚昭之懲此也收頓胡
降蔡而以臨吳地益集習于憚者之心益定師不遠勞而

秦不能乘然而吳之臂已斷于西而坐困于江介堅持之數十年而吳不爲楚舉者未之有也故吳之亡于越也越速而楚緩耳且吳亦楚實掣之而越始逸于收邪是楚之報吳也不忘吳焉足矣弗惛惛于一往弗泄泄于四顧所以不忘吳者深矣故曰楚之治蔡治吳者也非近小之知所能賄也君子許之焉可已

天下有略外之義無義外之略略者一事也義者終古也一事載終古之義而後其略也不近矣楚之姑舍吳以報蔡以爲略也亦非遺義以爲略也報讎之義非一逞而遂義也歸于報焉耳一逞而不振則胸胸則終不能報而抑

下之是故劉禪以通好于孫吳宋高以稱臣于女直慮及于敗之弗恤而以社稷人民殉之乎抑將有不能殉無已而下之也乎決于殉是周黨之見譏于君子也以社稷殉是欲買小孝而以太不孝買之也且夫一旦之氣信宿而餒無窮之情見迫而遷知不深勇不固人役之才而不爲人下者鮮事求可功求成以邀功名則陋以期全其忠孝則規模宏遠矣故能蹈義者慮義者也略不可遺義猶義不可遺略也且夫吳蔡之于楚怨于均矣非吳必報而蔡不必報者也吳猶蠱也蔡事楚宗周楚得國于平王而疾酬之以禍是苗釀螟生而螟食苗死也詩曰秉畀炎火惡

其于此生而賊此也紓吳以先蔡而吳不復敢興爭蔡之師紓蔡以先吳蔡睨楚而必要其後非但其勢然抑有以服其心與否也故報吳而先之以蔡其名正其志伸其謀允其事順四者義之屬也君子以義配氣小人以氣將義義者理之中事之制非其人不行一旦之忿惡足以勝之哉

鼯鼠之食牛鮮矣而數食魯之郊牛數于其所不恆異矣異者殆矢警之與君子不言警也君子于己而言警警其異焉耳且夫人之畏天以爲天之權任禍己而畏之是小人之畏也君子不以天之禍己而媚之不以天之禍己而

畏之故曰天作孽猶可違違之可矣畏其孽哉臣之所爲
子之事親逸其福避其禍明君之所逃惡周之所乘也彼
操炎炎而此惴惴胥吏之以事酷吏者也替之于君父而
靖之于胥吏以爲愿則志狡以爲恪則志淫以爲知而疾
入于愚故違天之孽猶近乎義邀天之福必絕乎理絕乎
理絕乎天矣警異者無適警畏天者有適畏無適警不以
牛之災而求之于郊有適畏則雖牛不災而固不敢輕言
郊也子曰君子畏天命非君子則不知命不知命妄儻其
或然畏之而益以狎之善爲修省之說者尤慎之于此
許遷于蔡非中國之故許矣蔡遷于州來非中國之故蔡

矣許遷于葉而楚有許是以滅于鄭蔡遷于州來而吳有
蔡是以滅于楚吳有蔡則是吳之蔡也故君子許楚以報
蔡焉尉官謂人曰殺人而義者令弗讎讎之則死楚以蠻
夷拘中國之元侯訴晉侵之以吳入之蔡非無義之可執
而胡許楚以報邪夫義者甚惡乎其爲名也名襲義襲以
一旦者也義集而充非一旦而可爲名也□□□□□
惟中國之得治爾吳之蔡而許之治楚則尤劣于許吳以
治楚君子不許吳以治楚而況于吳之蔡乎且今之爲吳
之蔡昔未爲吳之蔡而爲楚之蔡久矣厥貉以還蔡絕迹
于中國公子燮僅一思晉而通國讎殺之然則蔡者楚之

肺附也。蔡侯之復封楚，封之而蔡受之，是舍楚而天下
無蔡久矣。以楚之蔡，乘楚之敝，伐楚以殘楚，且立其廷，夕
操之刃，藉許蔡以義名，是惡人之不孝而使其子誅之也。
蔡之伐楚而殘楚者，豈以蠻夷不足與而舍之哉？薳氏之
貪于得裴，蔡申之吝于失裴，均之爲讎，街之知市，阻之爭
爾。瓦以一裴而拘人之君，申以一裴而殘人之國，牽帥天
子之元老，十八國之家君，爲之爭一裴之吝，爲之名曰背
□□□□。將誰欺邪？生死戴之百年之中國，亡而不憤，君
斯世子烹而不閔，儼然受茅土于其廷而不忤，去一稱王
之楚，得一斷髮文身之吳，而以社稷委之，猶曰蔡義殺可。

勿讎邪是義果惟妄人之襲而義爲賊矣謝枋得之拒聘也必正名其未嘗一日降元而後可拒也劉知遠之在晉陽也必不爲契丹下而後可代晉也不恆其德或承之羞晨楚夕吳假手而嚙之詩人之所爲惡背憎與中國無蔡一楚一吳春秋詳之非爲蔡恤也悲諸姬之子孫自亡自滅而爲天下咎非一日矣

盜殺鄭大夫先言盜而後言鄭不繫盜于鄭也盜弑蔡侯申先言盜而後言蔡不繫盜于蔡也賤士陪臣從乎君稱人而繫國逆乎君稱盜而不繫國諸侯之國有恆大夫無恆士從則其人逆則非其人諸侯之國有分士無分人其

以爲天下之通盜耳大夫奔而待放放而籍不絕尊其固
尊親其固親也賤士陪臣無恆尊親合則留違則去載贊
而出疆用不極其貴刑不治其族周之道也而春秋因之
是以知春秋用周之道也降士于尊親以勸天下之厚公
士于天下以勸天下之賢故周之道至矣大夫有固尊而
不失刑而猶不失也仕于他國而後失之故君大夫交相
勸以厚而邦固士陪臣之貴也因乎上之庸之而無固親
也無固親則于此于彼而皆其士士亦有以自勸于賢矣
其逆也于此于彼而爲天下之通盜士愈以自懲于不肖
矣周之道封建之法尊尊賢賢親親罪罪交相維而各有

其精意聖人因以制春秋之法嗚呼微矣

君弑而賊不討則不書葬書葬蔡昭公賊已討也衛殺州吁齊殺無知之必書錄功也蔡誅弑君之盜不書盜不足以名見誅盜不足以爲功也書得寶玉大弓不書盜之逐書葬蔡昭公不書盜之殺弗足當于春秋之法君子以是知賞罰之權矣故有國者恃弭盜而不恃誅盜盜誅焉而不足以紀則弗弭于先而議功其後不已陋乎匪直陋也劉裕挾歐孫恩之功而篡晉朱全忠挾背黃巢之力而移唐成尺寸之功獲不貲之賞賞淫權替而國隨之以亡可弗戒與且夫張角翟讓黃巢之禍逮天不非不可芟除之

易曰天下之動貞夫一者也一則貞二則淫故君子之法

審夫不一以定于一惡有因人之賢而姑俯之因人之不
肖而故仰之哉傳曰衛輒辭位以避父則衛人拒蒯瞶而
輔之可也是其爲說浮游其法于不一之塗爲沽名者俯
而爲椎鈍者仰勸天下以僞而便于賊恩也且夫使輒辭
位以避父其志必于避與抑志游于可避可弗避以觀國
人之情與如其志于必避也則未有悠悠之國人能移孝
子之心者也詩云母也天只不諒人只母不能得之子而
臣民能得之君乎國人其孰輔焉夷齊求仁仁斯得矣爲
仁繇己未聞其繇人也如其無固避之心而姑爲避也則
以試其欲取固與之術賢臣民之戴己而委惡于父也擇

子道而不知其至觀天下以僞而賊其仁良亦酷矣天下
未有不至而善者也至善者一而已矣一者仁也求仁而
得仁貞于一而守之約也故君子以心盡道以道立法以
法立名以名定禮孔子之于魯治叛人治之以禮于衛治
逆子治之以名禮無二制名無二稱正名之曰衛世子蒯
瞶正蒯瞶爲靈公之嗣也父尙爲世子子必不得爲君正
輒之必不可立也輒不可立衛人必不可叛輒而立之貞
一以斷復奚問輒之避與不避哉惟不可立故必避旣已
當避又奚立曹丕司馬炎以降篡者未嘗不固辭也而廢
益不可揜況父子之際哉言天下之蹟而不亂無他誠而

已矣誠斯一不誠斯二爲此說者吾知其誠之未至也誠不至仁不精執不固將欲言道而導天下以淫儒乃以僞爲世笑可不戒諸

求仁而得仁未聞求仁而得位者也求仁而得仁則無怨矣未聞求仁得位而以安者也求仁而得仁無所貪也未聞求仁而得位不待貪而自獲也蒯瞶之出輒壓于王父而不得伸其孝養靈公薨輒可伸矣奚但辭位而避之已哉請于國人迎父而嗣國國人聽是國人之爲君子成孝子之美也國人弗聽是國人者皆輒不共戴天之讎也誠壓于王父之命而不得報死之可矣輒必不肯立乎其位

而憐國人國人之賢者咸以自後必不出以裕先君之德
其黨南子而爲譖人以亂國者且心憚輒立之讎已復笑
輔哉輒遊而國人能強之輒之爲子可知矣必授之輒而
輔之以拒父國人之爲臣可知已無他歸于不仁而已矣
不仁之人而爲之酌其可何其謬也春秋書衛世子而魯
論論夷齊大義炳如日星乃猶懸立一國人輔輒之說以
疑天下洵然伯夷之去孤竹之臣民亦可迎夷以歸逐叔
齊而立之乎復奚辯

爲此說者曰仁未嘗不利也輒辭而國人固可輔則夫天
下之爲利計者亦當于仁焉求之也辭則得不辭則失人

亦惡可不自勉于仁哉嗚呼嬰兒之爭餌也以授之不爭者而相勸于不爭此老嫗之教也君子納天下于大倫而立說垂教以嬰兒之知愚天下乎輔之云者何也助之以終拒父也人方避父而我輔之以拒豈但嬰兒之哉強人而禽之先自禽矣

禮有可推而準者有不可推而準者可推而準者雖異而貫不可推而準者雖同而殊故曰近不必比遠不必乖一色之謂章異色之謂文知乎同異文章之情而後可以言禮喪不數聞非言葬也葬不廢聞葬非喪也喪非葬葬非喪之際微矣喪之不數聞謂以年斷者也三年之喪二十

七月間之積卒二十七月而得一問則雖有問亦二十七
月中固有之日矣天子之葬七月諸侯之葬五月大夫之
葬三月士之葬踰月繇踰月而極于七月其爲問也微矣
問積而要歸乎歲間微而受裁于月天之紀也喪者哀死
之情也葬者送死之事也哀死者從情情惡其不足送死
者從事事惡其不虔苟虔而事可舉故從乎死者而爲之
制是以自天子逮庶人喪之期均而葬之期不齊故譏葬
速之不虔者允矣譏葬速之不懷者非也自天子達于庶
人有異事無異懷信乎速之不懷與是天子之懷長而庶
人之懷短豈情也哉情惡其不足則歸問於歲以盡之事

惟其已虔則數間以月而仍之葬有事焉自天子降煩簡以差各得其日月而虔物以庀功以藏同軌同盟外嫺以期必至是已虔矣已虔而又需之懼執事者之虔弛矣春秋書閏月葬齊景公葬在閏從其實而言閏未嘗有譏于其臣子也喪之與葬同而異近而不比異以成文嗚呼微矣審之于微纖而辨殊而歸一是以善言禮者不僅恃夫推也

成乎惡者志爲上事爲下刑囚之而以施諸弑君之賊則不然故滅宋馮而督當罪馮不以分督之惡陽生不以分陳乞之惡其法一也而乞爲甚奚以言乞之甚邪督之弑

君爲陽弑也乞之弑君名爲陽生弑而實非爲陽生弑也
乞之惡不得以視督傳者以爲爲法受惡擬諸里克之列
是猶擬衛懿于季路也陳乞于齊景之父子縱之斂之迎
之隨之闕之以自斃而已乃以有齊塗之人不可欺也孰
是君子而顧爲之欺邪立荼者乞也逐陽生者乞也入陽
生者乞也弑荼者乞也陽生不得以有爲其國簡公不得
以自保其死陳氏之邪心非一旦一夕之故矣華督于馮
與與夷之閒未嘗有是阱也況里克之于夷吾哉前乎荼
之弑而高國逐以空齊也空齊而後乞之弑成弑成而後
陳氏之威福獨伸以無耦劉裕之于晉恭肅衍之于齊順

何恩焉而必刃一主以立之邪裕衍不以爲恩于晉恭齊
順而操戈則晉恭齊順不以爲裕衍所立而分惡天下後
世無閒辭焉春秋之法亦用人心之無閒者而已矣然則
陽生勿立乎其位不尤善乎夫陽生者雖欲勿立而不得
者也立之而乃以奪之陽生不能禁其不奪則不能制其
不立謂陽生之欲于立者將必陽生之亦欲于奪邪陽生
愚而畏死其立也冀以貫餘生也然亦未有不惴惴者矣
故陽生晉恭齊順立乎弒君者之手而不與宋馮等逆陳
乞劉裕蕭衍弒一君以立一君而不但與華督均罪弗獲
已而僅使視華督之刑姑從其事而刑之焉耳

叔還會吳于柤公志也仲孫何忌帥師伐邾季孫志也公會吳于郕公志也公入邾以邾子益來季孫志也且主盟臣各攜其心而以國試互相制而姑相從吳不有越之難齊不有陳氏之惡魯亡矣邾公室之附庸也邾存而季孫不得以爲利邾割而地蘊于魯終季之有矣公不能于臣而蔭吳以自庇郕之會吳責季孫曰國君道長大夫不出門公與吳之情可知已故意如逆而魯大有事于邾定公有爲于國而邾魯睦哀公立季亟兵邾而公亟通吳季賧邾以賧君君懲邾而怙吳邾非公之樂賧吳非季之樂怙者也乃季欲賧邾公不得止非徒勿止以躬親之公非爲

季康也公欲怙吳季不得沮吳人來伐季受盟焉季非爲公腹也相加以情相制以義公雖可止季而弗止季雖可沮公而弗沮公淫逞于邾而齊吳交至乃以委怨于季公外怙吳而季固困邾以激吳怒示吳之弗可怙而過在公嗚呼狂主不能戢其臣陰謀之陽徇之試國于凶危若將臨萬乘之敵而操其斂縱逆臣測主志而交相制姑聽之終撓之睥睨以爲口實若將挑仇讎之釁而陷之危亡子貢巨賢也子服何良大夫也乘除于掩抑背憎之中莫能挽而或囚之嗚呼小人之術百變將盈庭之士有不及盡億者與抑億之已中各有辭焉雖欲沮之而不得邪故陰

驚之謂腹如之猶真人無所施其至知人無所用其賢取
亡未著而盈庭束手以聽之死君破國之相積懼此而已
矣且微僅禍其國也季以之而逞害于邾遂禍于齊公以
之而投費于齊導爭于晉天下釜沸而皆魯之湯焉越不
起吳不熾邾溝開中原潰蚩尤之禍將徧天下而魯其先
矣吳不亡公不必更而恃越吳不亡公不肯改以平齊齊
敵于吳而報在魯齊噬之吳腹之魯之存百不得一也吳
亡公且失怙而戚亦孰知公之戚者乃其幸乎哀公之于
季則不如昭公也昭公弗忍以身殉之哀公弗忍以國殉
之志愈狂禍愈昌矣季孫之于君又不如趙鞅也鞅下吳

楚以僅保晉肥挑吳齊以亟殘魯保晉則猶有晉殘魯則
欲無魯保晉而小人譽君子不能詰殘魯則國人怨鄰國
有制鞅終得晉而季終失魯雖均盜與其成敗也亦因之
乎得失也競愈輟情愈毒志愈詭跡愈度爲謀愈下施及
戰國田文周最韓朋黃歇之徒行賈詐于君以內挑而外
合上害百而已利一歆然以爲奇祕之府通入視之蟲豸
之營也宵慮之旦趨之芒芒然相毆以卽于斃不亦哀夫
入其國毀其廟社絕其世不有其國日之曰滅均之乎有
其國也有其國其世不絕亦日之曰滅均之乎絕其世也
楚人潰蕭蕭地入宋書曰楚子滅蕭繼此而蕭遂絕矣鄰

已得許許復見經書曰鄭游速滅許許地已蘊于鄭楚復
封之他壤非故許矣齊鄭入許地蘊于鄭猶游速也僅書
入者許叔之返返其故許也宋公入曹曹遂以亡猶之蕭
也僅書入者曹因而亡宋未疆曹也故春秋之立義精矣
精斯嚴嚴斯辨辨斯恕嚴以恕仁義在己而以誅天下于
仁義無有銖累不施權衡道乃建于天下而無窮不得之
仁求之于義義未戕者猶冀其仁之動焉不得于義求之
于仁仁未極者猶畱以待他日之爲義者焉宋不兼曹之
地鄭莊不殄許之嗣恕以求之聖人所以全天下于仁義
也至不仁者義未戕而固非其義勢不便也勿使託于義

以免至不義者苟免于不仁而固非其仁力不逮也勿使託于仁以免楚不得越千里而有蕭許允在楚而鄭不敢問推其心而無可免聖人所以正仁義于天下也全天下于仁義而仁義不絕于天下正仁義于天下而天下不詭于仁義雖已毀人之廟社而仁義猶不絕者性也君子所以謂性善體天下而登之也猶未有其國絕其世而不可使詭于仁義者下愚之固于爲惡方窮而心不衰不可使詭也命也受命有貞淫而下愚不移聖人弗假之以賊道也聖人兼君子之大君子未至于聖人之精春秋有君子之辭焉有聖人之辭焉故曰窮理盡性以至于命

善利之明舜跖之差舍心以言迹也不得雖然亦無難知者也心之所繫迹不可掩故王通曰心迹之判久矣君子謂其不知道也魯哀公人邾以邾子益來齊人取謹闕歸益于邾齊人歸謹闕以迹言之兩相釋兩相改善之徒也乃卽其迹而言之兩蹠之相爲往復亦不待叩心而知矣此耽耽于邾彼逐逐于邑雖欲謂非兩蹠之相劫也不能此失謹及闕旋歸益于邾彼見益之歸遽歸謹及闕如築氣于革囊一洩而枵然皆盡卽欲謂非兩蹠之相懾而相暱也亦不能矣何也蹠之所爲動者利焉耳魯不道而入邾齊無必討之責或以其瑣瑣姍姍而爲之起與旣非義

矣其相報也置邾而亟兼譙闕無以酬邾人之望而不恤
是則魯得邾而齊得譙闕浸假不歸邾子而齊尤爲志之
滿也質他人之國以償利于己瑱瑱之媼亞固非齊所急
矣魯之入邾吳兵漸至簡盟城下而不釋且失譙闕而夕
歸其君知邾之新集不如譙闕之固有也雖知得邾不如
譙闕無簡少待以示不卽劫于齊邾而魯抑又不能非不
能待也以利行者唾之不舍撻之不置覆得不利而疾熾
其心所素喻者旣已專也故如手足之捍頭目無須臾之
勢矣于是而齊遂以譙闕歸之齊亦不能姑待也非不能
待也魯返益于邾齊以遂喪其所據初不期魯之釋邾以

必求之于謹聞以名激以實應出于其所不慮如吹狸耳
而不能自保其所嫌也春秋諸侯之不以利爲兵好者鮮
矣疾以利害疾以利慚疾以利遷未有若此之甚者也春
秋所書者迹也而倉遽下躁墮謀喪志之情竝其隱而繪
之是以天下無不迹之心無不心之迹君子洗心以藏密
莫之藏也而況于利人乎利人者無不遽也無不躁也謀
無可沈而志無可守者也跡之爲跡此而已矣故望而知
其爲舜之徒者無他得之也思失之也思擬之而以言議
之而以動知其爲善之致矣望而知其爲跡之徒者無他
得之也驚失之也驚俄然而長俄然而消知其爲利之迷

矣。善利或隱于心，靜躁必應于迹，豈難知哉？

獲者不善之辭也。公羊氏云：西狩獲麟，孔子曰：「吾道窮矣。」斯其得于傳者不妄也。子曰：「鳳鳥不至，河不出圖，吾已矣。」夫非惟仲尼之已也。堯舜文武百王之道已也。道已而鳳不至，圖不出，麟見獲，聖人無徵，以興百王之道，聖人之所謂窮也。春秋之作，本魯史以明王道，必假乎魯史者，魯足徵焉耳。明王道者，必有徵；行王道者，必有徵。子曰：「無爲而治者，其舜也。」與言承堯也。子曰：「無憂者，其文王乎？」言承大王王季也。聖人無所承，欲行帝王之道而無所紹，無所紹而始有爲，有爲而尙或不信，從始有憂。夫子承魯史作

春秋所紹者已非堯之緒大王王季之基則有爲而有憂
矣有爲有憂聖人所不吝也有爲故退時人之所譽進時
人之所毀予時人之所詘奪時人之所信有憂故先事而
懼已事而思因其畏心而加之戒因其慚心而爲之諱王
道乃明顧聖人之憂而有爲也必事之尙可憂而措之爲
也五伯之事魯史之文得聖人而爲之卽事而疾變于王
道韓起觀春秋而贊之以其近于王也近王則變之也易
矣道託文以傳文不足以傳道不可以爲聖人之徵文因
事以著事不能善其文則聖人雖徵之而不可以有爲是
故哀公之中年春秋之所可絕筆也久矣魯之會楚史猶

爲之諱也。楚之先晉，史猶內晉而長之，也是天下猶有恥也。齊桓之興天下，無特會晉文之興天下，無特伐是天下，猶有統也。未有伯天下之爭，折衷于齊魯，既有伯天下之爭，折衷于伯，是天下猶有與也。臣逆而弑賊，不逸討國亂，而大夫殺猶假于法，是天下猶有名也。有恥則可勸，有統則可理，有與則可與，有名則可正。恥不競，統不壹，與不親，名不審，聖人之所憂，猶可爲之憂也。衛盜殺君兄，蔡盜殺君陳，盜殺執政，天下移于盜，而無名矣。宋鄭相伐，相取俘殺，無度而鄰國無與，折衷天下散于戰，而無與矣。特相盟而背之，無禁特相伐而執私怨，以爲詞。晉人食北楚食南

秦食西吳越鉅勝以相食于江東天下析爲五分而無統
矣吳先晉而魯不爲存其名魯會吳而公不以爲譁天下
甘丁戴吳而無恥矣天下師師不知其正魯史無藉以善
其文魯史無善文革之則疑因之則妄聖人無徵以存其
道故夫子立乎獲麟之年溯已往之事因舊文立新法謂
夫哀定而上之天下道猶可行也得哀定以上之魯史而
徵之道猶可明也斷之二百四十二年勵其不競收其不
登治其不規定其不審封建之宇宙可維百王之常道不
遠聖人之道未窮聖人不欲已也事不足以善文文不足
以傳道變之則已傷爲之則無所承人理禮于下天道遷

于上東亭出西麟見于西郊而被獲然後聖人信其已窮而決謂百王之道終于已矣前乎百王之道窮後乎中國之道不得而不息故仲尼沒聖人不復作天固不憂而無欲爲于中國之心夫子之泣豈徒然哉夫百王之道中國之統有三紀焉人紀者井田封建之所準也天紀者鳳麟河圖之所詔也地紀者□□□□□□□□也獲麟天紀之衰也更四百餘年而三代之天下亡井田削封建滅人紀亂矣更四百餘年而□□□□□□□□□□□□□□□□矣故夫聖人道窮之歎非獨謂一聖人之道也先之前古之法後之萬年之人而無有不窮也道不窮聖人

不置故前乎獲麟而聖人猶憂天下猶欲有爲焉故春秋
修王道立盡人以俟天君子之學乎春秋學是焉耳矣

春秋家說卷三下終